


南史

卷七之十

内閣文庫	
番號	漢 1836
冊數	500 (189)
函號	別 10 1



南史卷七

梁本紀中第七

淺草文庫

李延壽撰

普通元年春正月乙亥朔大赦改元丙子日有蝕之已
 卯以司徒臨川王宏為太尉揚州刺史以金紫光祿大
 夫王份為尚書左僕射庚子扶南高麗等國並遣使朝
 貢二月癸丑以高麗王嗣子安為寧東將軍高麗王三
 月滑國遣使朝貢夏四月河南國遣使朝貢秋七月己

卯江淮海並溢九月乙亥有星晨見東方光爛如火是
歲魏正光元年

二年春正月辛巳祀南郊詔置孤獨園以恤孤幼戊子
大赦二月辛丑祀明堂三月庚寅大雪平地三尺夏四
月乙卯改作南北郊丙辰詔曰平秩東作義不在南前
代因襲有乖禮制可於震方具茲千畝於是徙籍田於
東郊外十五里五月癸卯琬琰殿火延燒後宮屋三千
間閏月丁巳詔自今可停賀瑞六月丁卯義州刺史文
僧明以州歸魏秋七月丁酉假大匡卿裴邃節督衆軍
侵魏甲寅魏荊州刺史桓叔興帥衆降八月丁亥始平

郡石鼓村地自開成井方六尺六寸深三十二丈冬十
一月百濟新羅國各遣使朝貢十二月戊辰以鎮東大
將軍百濟王餘隆爲寧東大將軍

三年春正月庚子以吳郡太守王暕爲尚書左僕射庚
戌都下地震三月乙卯巴陵王蕭昇薨夏四月丁卯汝
陰王劉端薨五月壬辰朔日有蝕之既癸巳大赦詔公
卿百僚各上封事連率郡國舉賢良方正直言之士秋
八月甲子婆利白題國各遣使朝貢冬十一月甲申開
府儀同三司始興王憺薨

四年春正月辛卯祀南郊大赦辛亥祀明堂二月乙亥

耕籍田孝弟力田賜爵一級預耕之司剋日勞酒冬十月庚午以中衛將軍袁昂爲尚書令卽本號開府儀同三司十一月癸未朔日有蝕之甲辰尚書左僕射王暕率十二月戊午用給事中王子雲議始鑄鐵錢狼牙脩國遣使朝貢

五年夏六月乙酉龍鬪于曲阿王陂因西行至建陵城所經樹木倒折開數十丈庚子以員外散騎常侍元樹爲平北將軍北青兗二州刺史率衆侵魏

六年春正月辛亥祀南郊大赦庚申魏徐州刺史元法極以彭城來降自去歲以來北侵諸軍所在剋獲甲戌

以元法僧爲司空封始安郡王二月辛巳改封法僧爲宋王三月丙午賜新附人長復除誣誤罪失一無所問夏五月巳酉修宿豫堰又修曹公堰於濟陰壬子遣中護軍夏侯亶督壽陽諸軍侵魏六月庚辰豫章王綜奔魏魏復據彭城秋七月壬戌大赦冬十二月壬辰都下地震是歲魏孝昌元年

七年春正月辛丑朔赦死罪以下夏四月乙酉太尉臨川王宏薨南州津改置校尉增加奉秩詔在位羣臣各舉所知凡是清吏咸使薦聞秋九月巳酉荊州刺史鄱陽王恢薨冬十一月庚辰丁貴嬪薨大赦是歲河南高

麗林邑滑國並遣使朝貢

大通元年春正月乙丑以尚書右僕射徐勉爲尚書左僕射詔百官奉祿自今可長給見錢辛未祀南郊詔流亡者聽復宅業蠲役五年尤貧家勿收今年三調孝弟力田賜爵一級是月司州刺史夏侯夔進軍三關所至皆剋初帝創同泰寺至是開大通門以對寺之南門取反語以協同泰自是晨夕講義多由此門三月辛未幸寺捨身甲戌還宮大赦改元大通以符寺及門名夏五月丙寅成景儁剋魏臨潼竹邑冬十月庚戌魏東豫州刺史元慶和以渦陽內屬甲寅曲赦東豫州十一月丁卯以中護軍蕭藻爲都督侵魏鎮于渦陽是歲林邑師于高麗等國各遣使朝貢

二年春正月乙酉蠕蠕國遣使朝貢二月築塞山堰癸丑魏孝明皇帝崩夏四月戊戌魏尒朱榮推奉孝莊帝庚子榮殺幼主及太后胡氏辛丑魏郢州刺史元願達以義陽降封願達爲樂平王是時魏大亂其北海王顥臨淮王彧汝南王悅並來奔北青州刺史元儁南荊州刺史李志皆以地降冬十月丁亥以魏北海王顥主魏遣東宮直閣將軍陳慶之衛送還北魏豫州刺史鄧獻以地降是歲魏武泰元年尋改爲建義又改曰永安

中大通元年春正月辛酉祀南郊大赦賜孝悌力田爵
一級辛巳祀明堂夏四月癸巳陳慶之攻拔魏梁城進
屠考城禽魏濟陰王暉業五月癸酉進剋虎牢魏孝莊
帝出居河北乙亥元顥入京師僭號建武六月壬午以
永興公主疾篤故大赦公主志也是月都下疫甚帝於
重雲殿爲百姓設救苦齋以身爲禱閏月護軍將軍南
康王績薨巳卯魏將尔朱榮攻殺元顥京師反正秋九
月辛巳朱雀航華表災癸巳幸同泰寺設四部無遮大
會上釋御服披法衣行清淨大捨以便省爲房素床瓦
器乘小車私人執役甲午升講堂法坐爲四部大眾開

涅槃經題癸卯羣臣以錢一億萬奉贖皇帝菩薩大捨
僧衆默許乙巳百辟詣寺東門奉表請還臨宸極三請
乃許帝三答書前後並稱頓首冬十月巳酉又設四部
無遮大會道俗五萬餘人會畢帝御金輅還宮御太極
殿大赦改元十一月戊子魏巴州刺史嚴始欣以城降
是歲盤盤蠕蠕國並遣使朝貢

二年夏四月癸丑幸同泰寺設平等會庚申大雨雹六
月丁巳遣魏汝南王悅還北主魏庚申以魏尚書左僕
射范遵爲司州牧隨悅北侵是月林邑扶南國遣使朝
貢秋八月庚戌幸德陽堂祖魏主元悅山賊寇會稽郡

南史卷七
本紀 五
縣九月壬午假超武將軍湛海珍節以討之是歲魏莊
帝殺其權臣尔朱榮其黨奉魏長廣王曄為主而殺孝
莊帝年號建明

三年春正月辛巳祀南郊大赦丙申以魏尚書僕射鄭
元護爲征北大將軍二月辛丑祀明堂夏四月己巳皇
太子統薨六月癸丑立昭明太子子華容公歡爲豫章
郡王枝江公譽爲河東郡王曲江公譽爲岳陽郡王是
月丹丹國遣使朝貢秋七月乙亥立晉安王綱爲皇太
子大赦賜爲父後者及出處忠孝文武清勤並爵一級
庚寅詔宗戚有服屬者並賜湯沐食鄉亭侯各隨遠近

以爲差次壬辰以吏部尚書何敬容爲尚書右僕射九
月狼牙修國遣使朝貢是秋吳興王野稻饑者賴焉冬
十月己酉上幸同泰寺升法座爲四部衆說涅槃經訖
于乙卯前樂山縣侯蕭正則有罪流徙至是招誘亡命
欲寇廣州在所討平之十一月乙未上幸同泰寺升法
座爲四部衆說般若經訖十二月辛丑是歲魏尔朱
兆又廢其主曄而奉節閔皇帝改建明二年爲普泰元
年又魏渤海王高歡舉兵信都別奉渤海太守朗爲主
改普泰元年爲中興

四年春正月丙寅以開府儀同三司南平王偉爲大司

馬以司空宋王元法僧爲太尉尚書今以開府儀同三
司袁昂爲司空立臨川靖惠王宏子正德爲臨賀郡王
庚午立嫡皇孫大器爲宣城郡王位列諸王上癸未魏
南兗州刺史劉世明以城降二月壬寅以太尉元法僧
還北王魏以侍中元景隆爲徐州刺史封彭城郡王通
直常侍元景宗爲青州刺史封平昌郡王隨法僧北侵
庚戌新除揚州刺史邵陵王綸有罪免爲庶人三月庚
午侍中領國子博士蕭子顯表置制旨孝經助教一人
生十人專通帝所釋孝經義夏四月盤盤國遣使朝貢
秋七月甲辰星隕如雨九月乙巳加司空袁昂尚書令

冬十一月高麗國遣使朝貢十二月丙子魏彭城王
朱仲遠來奔以爲定洛將軍封河南王北侵隨所剋土
使自封建庚辰以太尉元法僧爲郢州刺史驃騎大將
軍開府同三司之儀是歲魏相渤海王高歡平尔朱氏
廢節閔皇帝及自所奉渤海故王朗而奉平陽王脩是
爲孝武皇帝改中興二年爲大昌尋又改爲永熙元年
五年春正月辛卯祀南郊大赦賜孝弟力田爵一級先
是一日丙夜南郊令解滌之等到郊所履行忽聞異香
三隨風至及將行事奏樂道神畢有神光圓滿壇上朱
紫黃白雜色食頃乃滅戊申都下地震巳酉長星見辛

亥祀明堂二月癸未幸同泰寺設四部大會升法座發
金字般若經題訖于巳丑三月丙辰大司馬南平王偉
薨夏五月戊子都下大水御道通船六月巳卯魏建義
城主蘭保殺東徐州刺史崔祥以下邳降冬十月庚申
以尚書右僕射何敬容爲左僕射以吏部尚書謝舉爲
右僕射是歲河南波斯盤盤國並遣使朝貢

六年春二月癸亥耕籍田大赦賜孝悌力田爵一級三
月巳亥以行河南王可李振爲西秦河二州刺史正封
河南王甲辰百濟國遣使朝貢夏四月丁卯熒惑在南
斗秋七月甲辰林邑國遣使進貢冬十月丁卯以信武

將軍元慶和爲鎮北將軍封魏王率衆北侵閏十二月
丙午西南有雷聲二是歲魏孝武帝迫于其相高歡出
居關中歡又別奉清河王世子善見爲主是爲孝靜帝
改永熙三年爲天平元年魏於是始分爲兩孝武旣至
關中又與丞相宇文泰不平未幾遇鴆而崩

大同元年春正月戊申朔大赦改元二月辛巳祀明堂
丁亥耕籍田辛丑高麗丹丹國並遣使朝貢三月丙寅
幸同泰寺設無遮大會辛未滑國遣使朝貢夏四月庚
子波斯國遣使朝貢壬戌幸同泰寺鑄十方銀像并設
無碍會秋七月辛卯扶南國遣使朝貢冬十月用黃塵

如雲十一月壬戌北梁州刺史蘭欽攻漢中魏梁州刺
史元羅降癸亥復梁州是歲西魏又皇帝大統元年
二年春二月乙亥耕籍田三月庚申詔求讜言及今文
武在位舉士戊寅帝幸同泰寺設平等法會夏四月乙
未以開府同三司之儀元法僧爲太尉五月癸卯以魏
梁州刺史元羅爲青冀二州刺史封東郡王六月丁亥
詔郊明堂陵廟等令改視散騎侍郎秋九月辛亥幸同
泰寺設四部無碍法會冬十月乙亥詔大舉北侵壬午
幸同泰寺設無碍大會十一月雨黃塵如雪攬之盈掬
巴亥詔北侵衆軍班師辛亥都下地震生白毛長二尺

十二月壬申與東魏通和

三年春正月辛丑祀南郊大赦賜孝弟力田爵一級是
夜朱雀門災壬寅雨灰黃色二月丁亥耕籍田癸巳以
護軍將軍蕭藻爲尚書左僕射三月戊戌立昭明太子
子警爲武昌郡王警爲義陽郡王夏五月癸未幸同泰
寺鑄十方金銅像設無碍法會六月青州胸山隕霜秋
七月青州雪害苗稼癸卯東魏人來聘巴酉義陽王警
薨八月辛卯幸阿育王寺設無碍法喜食大赦九月使
兼散騎常侍張臯聘子東魏閏九月甲子侍中太尉元
法僧薨冬十月丙辰都下地震是歲饑

四年春二月己亥耕籍田二月河南蠕蠕國並遣使朝
貢夏五月甲戌東魏人來聘六月辛丑日有蝕之秋七
月癸亥詔以東冶徒李胤之降象牙如來真形大赦戊
辰使兼散騎常侍劉孝儀聘于東魏八月甲辰詔南兗
等十二州既經饑饉曲赦遇租宿責勿收今年三調九
月閱武于樂游苑

五年春正月乙卯以護軍將軍廬陵王續爲驃騎將軍
安右將軍尚書左僕射蕭藻爲中衛將軍並開府儀同
三司中權將軍丹陽尹何敬容以本號爲尚書令吏部
尚書張纘爲尚書左僕射丁巳御史中丞參禮儀事賀

琛奏今南北二郊及籍田往還並宜御輦不復乘路三
郊請用素輦籍田往還乘常輦皆以侍中陪乘停大將
軍及太僕詔付尚書博議施行改素輦名大同輦郊祀
宗廟乘佩輦辛未祀南郊詔孝弟力田及州閭鄉黨稱
爲善人者各賜爵一級秋八月乙酉扶南國獻主犀冬
十一月乙亥東魏人來聘十二月使兼散騎常侍柳豹
聘于東魏是歲都下訛言天子取人肝以飴天狗大小
相警日晚便閉門持仗數月乃止

六年春正月庚戌朔曲赦司豫徐兗四州二月己亥耕
籍田夏四月癸未詔晉宋齊三代諸陵有職司者勤加

南史卷七
本紀一
守護五月己卯河南王遣使朝獻馬及方物求釋迦像
并經論十四條勅付像并制旨涅槃般若金光明講疏
一百三卷秋七月丁亥東魏人來聘遣散騎常侍陸晏
子報聘八月戊午大赦辛未盤盤國遣使朝貢九月庚
戌司空袁昂薨冬十一月己卯曲赦都下十二月壬子
江州刺史豫章王歡薨

七年春正月辛巳祀南郊大赦辛丑祀明堂二月乙巳
以行宕昌王梁彌泰爲平西將軍河涼二州刺史正封
宕昌王辛亥耕籍田乙卯都下地震夏四月戊申東魏
人來聘遣兼散騎常侍明少遐報聘冬十一月丙子詔

停所在使役女丁十二月壬寅東魏人來聘遣兼散騎
常侍袁狎報聘丙辰於宮城西立士林館延集學者是
歲宕昌蠕蠕高麗百濟滑國各遣使朝貢百濟求涅槃
等經疏及醫工畫師毛詩博士並許之交州人李賁攻
刺史蕭詒

八年春正月安成郡人劉敬躬挾左道以及二月戊戌
汪州刺史湘東王繹遣中兵曹子郢討禽之送于都斬
之建康市三月於江州新蔡高塘立頌平屯墾作蠻田
九年春閏正月丙申地震生毛三月以太子詹事謝舉
爲尚書僕射夏四月林邑王破德州攻李賁賁將范脩

又破林邑王於九德敗走之冬十一月益州刺史武陵王紀進號征西將軍開府儀同三司

十年春正月李賁竊號於交阯年號天德三月甲午幸蘭陵庚子謁建陵有紫雲蔭陵上食頃乃散帝望陵流涕所霜草皆變色陵傍有枯泉至是而流水香潔辛丑哭于脩陵壬寅於皇基寺設法會詔賜蘭陵老少位一階并加頒賚所經縣邑無出今年租賦因賦還舊鄉詩癸卯詔園陵職司恭事勤勞並錫位一階并加賜賚已酉幸京口城北固樓因改名北顧庚戌幸回賓亭宴帝鄉故老及所經近縣奉迎候者少長數千人各賚錢二

千夏四月乙卯至自蘭陵詔鰥寡孤獨尤貧者贍恤各有差五月廣州人盧子略反刺史新渝侯映討平之詔曲赦廣州秋九月己丑赦冬十一月大雪平地三尺

十一年春正月震華林園光嚴殿重雲閣帝自貶拜謝上天累刻乃止夏四月東魏人來聘冬十月己未詔復開贖罪典

中大同元年春正月丁未曲阿縣建陵隧口石辟邪起舞有大蛇鬪隧中其一被傷奔走青蟲食陵樹葉略盡癸丑交州刺史楊暕交阯嘉寧城李賁竄入屈篠洞交州平三月乙巳大赦庚戌幸同泰寺講金字三慧經

仍施身夏四月丙戌皇太子以下奉贖仍於同泰寺解
設法會大赦改元是夜同泰寺災六月辛巳竟天有聲
如風水相薄秋七月甲子詔自今有犯罪者非大逆父
母祖父母勿坐丙寅詔曰朝四暮三衆狙皆喜名實未
虧而喜怒爲用頃聞外間多用九佰錢佰減則物貴佰
足則物賤非物有貴賤是心有顛倒至於遠方日更滋
甚自今可通用足佰錢八月丁丑東揚州刺史武昌王
警薨甲午渴槃隨國遣使獻方物冬十一月癸酉汝陰
王劉哲薨

太清元年春正月己亥朔日有蝕之壬寅荊州刺史盧

陵王續薨辛酉祀南郊大赦甲子祀明堂是月東魏相
渤海王高歡薨二月己卯白虹貫日庚辰東魏司徒侯
景求以河南十五州內屬壬午以景爲大將軍封河南
王大行臺承制如鄧禹故事丁亥耕籍田三月庚子幸
同泰寺設無遮大會上釋御服服法衣行清淨大捨名
曰羯磨以五明殿爲房設素木牀葛帳土瓦器乘小輿
私人執役乘輿法服一皆屏除甲辰遣司州刺史羊鴉
仁率土州刺史桓和仁州刺史湛海珍等應接侯景兵
未至而東魏遣兵攻景景又割地求救於西魏方解圍
乙巳帝升光嚴殿講堂坐師子講金字三慧經捨身夏

四月庚寅羣臣以錢一億萬奉贖皇帝菩薩僧衆默許
戊寅百辟詣鳳莊門奉表三請三答頓首並如中大通
元年故事丁亥服袞冕御輦還宮幸太極殿如卽位禮
大赦改元是月神馬出皇太子獻寶馬頌六月戊辰以
前雍州刺史鄱陽王範爲征北將軍總督漢北征討諸
軍事秋七月庚申羊鴉仁入縣瓠城八月乙丑諸軍北
征以南豫州刺史蕭明爲大都督赦緣邊初附諸州戊
子以大將軍侯景錄行臺尚書事九月癸卯王游苑成
輿駕幸苑冬十一月東魏將慕容紹宗大敗蕭明于寒
山明被俘執紹宗進圍潼州十二月戊辰命太子舍人

元貞還北爲東魏主

二年春正月癸巳朔兩月相承如鉤見于西方戊戌詔
在位各舉所知己亥東魏克渦陽辛丑以尚書僕射謝
舉爲尚書令以守吏部尚書王克爲尚書僕射甲辰東
魏剋殷豫二州三月甲辰撫軍將軍高麗王高延卒以
其子成爲寧東將軍高麗王樂浪公己未屈獠洞斬李
賁傳首建鄴夏四月丙子詔在朝及州郡各舉士五月
辛丑以新除中書令邵陵王綸爲安前將軍開府儀同
三司辛亥曲赦交愛德三州六月天裂于西北長十丈
闊二丈光出如電其聲若雷秋七月使兼散騎常侍謝

班聘于東魏結和八月戊辰侯景舉兵反甲辰使開府儀同三司邵陵王綸都督衆軍討景曲赦南豫州九月戊辰地震江左尤甚壞屋殺人地生白毛長二尺益州市有飛蠹萬羣螫人死冬十月侯景襲譙州進攻陷歷陽戊申以臨賀王正德爲平北將軍都督諸軍屯丹陽郡己酉景自橫江濟采石辛亥至建鄴臨賀王正德率衆附賊十一月戊午朔設壇刑白馬祀蚩尤於太極殿前己未景立蕭正德爲天子於南關前辛酉賊攻陷東府城庚辰邵陵王綸帥武州刺史蕭弄璋前譙州刺史趙伯超等入援乙酉進軍湖頭與賊戰賊敗績丙戌安

北將軍鄱陽王範遣世子嗣雄信將軍裴之高率衆入援次張公洲十二月戊申天西北裂有光如火尚書令謝舉卒丙辰司州刺史柳仲禮前衡州刺史韋粲高州刺史李遷仕前司州刺史羊鴉仁等率軍入援三年春正月丁巳大都督柳仲禮率衆軍分據南岸賊濟軍於青塘襲殺韋粲庚申白虹貫日三重邵陵王綸臨城公大連等率兵集南岸戊辰有流星長三十丈墮武庫李遷仕及天門太守樊文皎進軍青溪東爲賊所破文皎死之壬午樊惑守心二月侯景遣使求和皇太子固請帝乃許之盟于西華門下景旣還東城米歸于

石頭亦不解圍啓求遣諸軍退丁未皇太子又命南兗
州刺史南康王會理前青冀二州刺史湘潭侯退率江
北之衆頓于蘭亭苑甲子以開府儀同三司丹陽尹邵
陵王綸爲司空以合州刺史鄱陽王範爲征北大將軍
開府儀同三司以司州刺史柳仲禮爲侍中尚書僕射
時景姦計旣成乃表陳帝失復舉兵向關三月城內以
景違盟設壇告天地神祇戊午前司州刺史羊鴉仁等
進軍東府北與賊戰大敗時四方征鎮入援者三十餘
萬莫有鬪志自相抄奪而已丁卯賊攻陷宮城縱兵大
掠已巳賊矯詔遣石城公大款解外援軍庚午侯景自
爲都督中外諸軍事大丞相錄尚書事辛未援軍各退
散丙子熒惑守心夏四月己丑都下地震丙申又震己
酉帝以所求不供憂憤寢疾是月青冀二州刺史明少
遐東徐州刺史湛海珍北青州刺史王奉伯各舉州附
東魏五月丙辰帝崩于淨居殿時年八十六辛亥遷梓
宮于太極前殿十一月乙卯葬于脩陵追尊爲武皇帝
廟號高祖帝性淳孝六歲獻皇太后崩水漿不入口三
日哭泣有過成人及丁文帝憂時爲齋隨王諮議隨府
在荆鎮以病聞便投劾星馳不復寢食倍道就路憤風
驚浪不暫停止帝形容本壯及至都銷毀骨立親表士

友皆不復識望宅奉諱氣絕久之每哭輒歐血數升服
內日惟食麥二溢拜埽山陵涕淚所洒松草變色及居
帝位即於鍾山造大愛敬寺青溪邊造智度寺於臺內
立至敬等殿又立七廟堂月中再設淨饌每至晨拜涕
泗滂沱哀動左右少而篤學能事畢究雖萬機多務猶
卷不輟手燃燭側光常至戊夜撰通史六百卷金海三
十卷制旨孝經義周易講疏及六十四卦二繫文言序
卦等義樂社義毛詩春秋答問尚書大義中庸講疏孔
子正言孝經講疏凡二百餘卷王侯朝臣皆奉表賀疑
帝皆爲解釋修飾國學增廣生員立五館置五經博士
天監初何佟之賀瑒嚴植之明山賓等覆述制旨拜撰
吉凶賓軍嘉立禮一千餘卷帝稱制斷疑焉大同中於
臺西立士林館領軍朱异太府卿賀琛舍人孔子祛等
遞互講述皇太子宣城王亦於東宮宣猷堂及揚州解
開講於是四方郡國莫不向風爰自在田及登寶位躬
制贊序詔誥銘誅箴頌賤奏諸文又百二十卷六藝備
閑綦登逸品陰陽緯候卜筮古決草隸尺牘詩書莫不
稱妙晚乃溺信佛道日止一食膳無鮮腍惟豆羹麩飯
而已或遇事擁日儻移中便嗽口以過製涅槃小品淨
名三慧諸經義記數百卷聽覽餘閑即於重雲殿及同

泰寺講說名僧碩學四部聽衆常萬餘人身衣布衣木
綿阜帳一冠三載一被二年自五十外便斷房室後宮
職司貴妃以下六宮禕褕三翟之外皆衣不曳地傍無
錦綺不飲酒不聽音聲非宗廟祭祀大會饗宴及諸法
事未嘗作樂勤於政務孜孜無怠每冬月四更竟卽敕
把燭看事執筆觸寒手爲皴裂然仁愛不斷親親及所
愛愆犯多有縱捨故政刑弛紊每決死罪常有哀矜涕
泣然後可奏性方正雖居小殿暗室恒理衣冠小坐暑
月未嘗褰袒雖見內豎小臣亦如遇大賓也初齊高帝
夢屐而登殿顧見武明二帝後一人手張天地圖而不
識問之答曰順子後及崔慧景之逼長沙宣武王入援
至越城夢乘馬飛半天而墜帝所馭化爲赤龍騰虛獨
上時臺內有宿衛士爲覲常見太極殿有六龍各守一
柱末忽失其二後見在宣武王宅時宣武爲益州覲乃
往蜀伏事及宣武在郢此覲還都乃見六龍俱在帝所
寢齋遂去郢之雍中途遇疾且死謂同侶曰蕭雍州必
作天子具以前事語之推此而言蓋天命也雖在蒙塵
齋戒不廢及疾不能進膳盥漱如初皇太子日中再朝
每問安否涕泗交面賊臣侍者莫不掩泣疾又口苦索
蜜不得再曰荷荷遂崩賊祕之太子問起居不得見勸

于閣下始天監中沙門釋寶誌爲詩曰昔年三十八今年八十三四中復有四城北火酣酣帝使周捨封記之及中大同元年同泰寺災帝啓封見捨手迹爲之流涕帝生於甲辰三十八剋建鄴之年也遇災歲實丙寅八十三矣四月十四日而起火之始自浮屠第三層三者帝之昆季次也帝惡之召太史令虞履筮之遇从履曰無害其繇云西南得朋東北喪朋安貞吉文言云東北喪朋乃終有慶帝曰斯魔鬼也西應見卯金來剋亦卯爲陰賊鬼而帶賊非魔何也孰爲致之西爲口舌當乎說位說言乎兌故知善言之口宜前爲法事於是人人

讚善莫不從風或刺血灑地或刺血書經穿心然燈坐禪不食及太清元年帝捨身光嚴重雲殿游仙化生皆震動三日乃止當時謂之祥瑞識者以非動而動在鴻範爲祇以比石季龍之敗殿壁畫人頸皆縮入頭之類時海中浮鵠山去餘姚岸可千餘里有女人年三百歲有女官道士四五百人年並出百但在山學道遣使獻紅席帝方捨身時其使適至云此草常有紅鳥居下故以爲名觀其圖狀則鸞鳥也時有男子不知何許人於大衆中自割身以飴饑鳥血流徧體而顏色不變又沙門智泉鐵鈎挂體以然千燈一日一夜端坐不動開

講日有三足鳥集殿之東戶自戶適于西南縣楣三飛
三集白雀一見于重雲閣前連理樹又有五色雲浮於
華林園昆明池上帝既流遁益甚境內化之遂至喪亡
云

論曰梁武帝時逢昏虐家遭冤禍既地居勢勝乘機而
作以斯文德有此武功始用湯武之師終濟唐虞之業
豈曰人謀亦惟天命及據圖籙多歷歲年制造禮樂敦
崇儒雅自江左以來年踰二百文物之盛獨美于茲
先王文武遞用德刑備舉方之水火取法陰陽爲國之
道不可獨任而帝留心俎豆忘情于戚溺於釋教弛於
刑典既而帝紀不立悖逆萌生反噬鸞軌皆自子弟
霜并戒卒至亂亡自古撥亂之君固已多矣其或樹
失所而以後嗣失之未有自己而得自己而喪追
懼之仁以致窮門之酷可爲深痛可爲至戒者乎

南史卷七

南史卷八

梁本紀下第八

子延壽

撰

太宗簡文皇帝諱綱字世讚小字大通武帝第三子昭
 明太子母弟也天監二年十月丁未生于顯陽殿五年
 封晉安王普通四年累遷都督雍州刺史中大通三年
 被徵入朝未至而昭明太子謂左右曰我夢與晉安王
 對奕擾道我以班劍授之王還當有此加乎四月昭明

康熙二十五年重修

南史卷八

本紀

太子薨五月丙申立晉安王爲皇太子七月乙亥臨軒
策拜以脩繕東宮權居東府四年九月移遷東宮太清
三年臺城陷太子坐永福省見侯景神色自若無懼容
五月丙辰帝崩辛巳太子卽皇帝位大赦癸未追尊穆
貴嬪爲皇太后追諡妃王氏爲簡皇后六月丙戌以南
康王會理爲司空丁亥立宣城王大器爲皇太子壬辰
立當陽公大心爲尋陽郡王石城公大款爲江夏郡王
寧國公大臨爲南海郡王臨城公大連爲南郡王西豐
公大春爲安陸郡王新塗公大成爲山陽郡王臨湘公
大封爲宜都郡王高唐公大莊爲新興郡王秋七月甲

寅廣州刺史元景仲謀應侯景西江督護陳霸先攻之
景仲自殺霸先迎定州刺史蕭勃爲刺史庚午以司空
南康王會理爲兼尚書令是月九江大饑人相食者十
四五八月癸卯征東大將軍開府儀同三司南徐州刺
史蕭藻薨丙午侯景矯詔儀同三司位比正公自令悉
不加將軍以爲定準冬十月丁未地震是月百濟國遣
使朝貢見城寺荒蕪哭于闕下

大寶元年春正月辛亥朔大赦改元丁巳天雨黃沙巳
未西魏剋安陸執司州刺史柳仲禮盡有漢東地丙寅
月晝見于東方癸酉前江都令祖皓起義兵于廣陵二

月癸未侯景攻下廣陵皓見害乙巳以尚書僕射王克
爲左僕射丙午侯景逼帝幸西州夏五月丙辰東魏靜
帝遜位于齊庚午開府儀同三司鄱陽王範薨自春迄
夏大旱人相食都下尤甚六月庚子前司州刺史羊鴉
仁自尚書省出奔江陵秋七月戊辰賊行臺任約寇江
州刺史尋陽王大心以州降之八月甲午湘東王繹遣
領軍將軍王僧辯逼郢州邵陵王綸棄郢州走九月乙
亥侯景自進位相國封二十郡爲漢王冬十月乙未景
又逼帝幸西州曲宴自加宇宙大將軍都督六合諸軍
事立皇子大鈞爲西陽郡王大威爲武平郡王大球爲

建安郡王大昕爲義安郡王大摯爲綏建郡王大園爲
樂梁郡王壬寅侯景害司空南康王會理十一月任約
進據西陽分兵寇齊昌執衡陽王獻送都下害之湘東
王繹遣前寧州刺史徐文盛拒約南郡王前中兵參軍
張彪起義於會稽若邪山攻破浙東諸縣

二年春二月邵陵王綸走至安陸董城爲魏所攻見殺
三月庚戌魏文帝崩夏閏四月侯景圍巴陵六月乙巳
解圍宵遁秋七月景還至建鄴八月戊午景遣僞衛尉
卿彭儁廂公王僧貴入殿廢帝爲晉安王害皇太子大
器尋陽王大心西陽王大鈞武寧王大威建安王大球

義安王大昕及尋陽王諸子二十餘人矯爲帝詔以爲
次當支庶宜歸正嫡禪位於豫章王棟使呂季略送詔
今帝寫之帝書至先皇念神器之重思社稷之固越升
非次遂主震方嗚咽不能自止賊衆皆爲掩泣乃幽帝
于永福省棟卽位改元天正使害南海王大臨於吳郡
南郡王大連於姑熟安陸王大春於會稽新興王大莊
於京口冬十月壬寅帝崩於永福省時年四十九賊僞
諡曰明皇帝廟稱高宗明年三月己丑王僧辯平侯景
率百官奉梓宮升朝堂元帝追崇爲簡文皇帝廟號太
宗四月乙丑葬莊陵帝幼而聰睿六歲便能屬文武帝
弟之信於前面試帝攬筆立成文武帝歎曰常以東宮
爲虛今則信矣及長器宇寬弘未嘗見喜愠色尊嚴若
神方願豐下須鬢如畫直髮委地雙眉翠色項毛左腋
連錢入背手執玉如意不相分辨眇眇則目光燭人讀
書十行俱下辭藻艷發博綜羣言善談玄理自十一便
能親庶務歷試藩政所在稱美性恭孝居穆貴嬪憂哀
毀骨立所坐席霑濕盡爛在襄陽拜表侵魏遣長史柳
津司馬董當門壯武將軍杜懷寶振遠將軍曹義宗等
進軍剋南陽新野等郡拓地千餘里及居監撫多所弘
宥文案簿領纖豪必察弘納文學之士賞接無倦嘗於

玄圃述武帝所製五經講疏聽者傾朝野雅好賦詩其
自序云七歲有詩癖長而不倦然帝文傷於輕靡時號
宮體所著昭明太子傳五卷諸王傳三十卷禮大義二
十卷長春義記一百卷法寶連璧三百卷謝客文涇渭
三卷玉簡五十卷光明符十二卷易林十七卷竈經二
卷沐浴經三卷馬槩譜一卷碁品五卷彈碁譜一卷新
增白澤圖五卷如意方十卷文集一百卷並行於世初
卽位制年號將曰文明以外制強臣取周易內文明而
外柔順之義恐賊覺乃改爲大寶雖在蒙塵尚引諸儒
論道說義披尋墳史未嘗暫釋及見南康王會理誅知
不义指所居殿謂舍人殷不害曰龐涓死此下又曰吾
昨夢吞土試思之不害曰昔重耳饋塊卒反晉國陛下
所夢將符是乎帝曰儻幽冥有徵箕斯言不妄初景納
帝女溧陽公主公主有美色景惑之妨於政事王偉每
以爲言景以告主主出惡言偉知之懼見讒乃謀廢帝
而後間主苦勸行殺以絕衆心廢後王偉乃與彭儁王
脩纂連觴於帝曰丞相以陛下幽憂旣久使臣上壽帝
笑曰已禪帝位何得言陛下此壽酒將不盡此乎於是
儁等并齎酒肴曲項琵琶與帝極飲帝知將見殺乃盡
酣謂曰不圖爲樂一至於斯旣醉而寢偉乃出儁進土

南史卷八
世祖孝元皇帝諱繹字世誠小字七符武帝第七子也
初武帝夢眇目僧執香爐稱託生王宮既而帝母在采
女次侍始褰戶幔有風回一褕武帝意感幸之采女夢月
墮懷中遂孕天監七年八月丁巳生帝舉室中非常香
有紫胞之異武帝奇之因賜采女姓阮進爲脩容十三
年封湘東王太清元年累遷爲鎮西將軍都督荊州刺
史三年三月侯景陷建鄴四月世子方等至自建鄴知
臺城不守帝命柵江陵城周回七十里鎮西長史王冲
等拜牋請爲太尉都督中外諸軍事承制主盟帝不許
曰吾於天下不賤寧俟都督之名帝子之尊何藉上台
之重議者可斬投筆流淚冲等重請不從又請爲司空
以主諸侯亦弗聽乃開鎮西府辟天下士是月帝徵兵

囊王脩纂坐上乃崩竟協於夢偉撤戶屏爲棺遷殯于
城北酒庫中帝自幽繫之後賊乃撤內外侍衛使突騎
圍守牆垣悉有枳棘無復紙乃書壁及板鄣爲文自序
云有梁正士蘭陵蕭世讚立身行道終始若一風雨如
晦雞鳴不已弗欺暗室豈況三光數至於此命也如何
又爲文數百篇崩後王偉觀之惡其辭切即使刮去有
隨偉入者誦其連珠三首詩四篇絕句五篇文並悽愴
云

於湘州刺史河東王譽譽拒命尋上甲侯韶自建鄴至
宣三月十五日密詔授帝位假黃鉞大都督中外諸軍
事司徒承制於是立行臺於南郡而置官司焉七月遣
世子方等討河東王譽軍敗死之又遣鎮兵將軍鮑泉
討譽九月乙卯雍州刺史岳陽王譽舉兵寇江陵其將
杜崩兄弟來降譽遁走鮑泉攻湘州未剋又遣左衛將
軍王僧辯代將及簡文帝卽位改元爲大寶元年帝以
簡文制于賊臣卒不遵用正月使少子方晷質于魏魏
不受質而約爲兄弟四月剋湘州斬譽湘州平雍州剋
史岳陽王譽自稱梁王蕃于魏魏遣兵助伐襄陽先是
邵陵王綸書已言凶孽祕之以待湘州之捷是月壬寅
始命陳瑩報武帝崩聞帝哭于正寢六月江夏王大款
山陽王大成宜都王大封自信安來奔九月辛酉以前
郢州刺史南平王恪爲中衛將軍尚書令開府儀同三
司改封大款爲臨川郡王大成爲桂陽郡王大封爲汝
南郡王十一月甲子南平王恪等奉牋進位相國總百
揆帝不從二年三月侯景悉兵西上閏四月景遣其將
宋子仙任約襲郢州執刺史方諸庚戌領軍王僧辯屯
師巴陵五月癸未帝遣將胡僧祐陸法和援巴陵六月
僧祐等擊破景將任約軍禽約景解圍宵遁以王僧辯

爲征東將軍開府儀同三司尚書令帥衆追景所至皆捷進圍郢州獲賊將宋子仙等九月盤盤國獻馴象十月辛丑朔紫雲如蓋臨江陵城是月簡文帝崩開府儀同三司王僧辯等奉表勸進帝奉諱大臨三日百官編素苴表不許司空南平王恪率宗室領軍將軍胡僧祐率羣僚江州別駕張佚率吏人並奉牋勸進帝固讓十一月乙亥僧辯又奉表勸進又不從時巨寇尚存帝未欲卽位而四方表勸前後相屬乃下令斷表承聖元年二月王僧辯衆軍發自尋陽帝馳檄四方購獲景及逆者封萬戶開國公絹布五萬匹三月僧辯等

平景傳首江陵戊子以賊平告明堂大社己丑僧辯等又表勸進曰衆軍以今月戊子總集建康賊景烏伏獸窮頻擊頻挫姦竭詐盡深溝自固臣等分勒武旅百道同趨突騎短兵犀函鐵楯結隊千羣持戟百萬止紂七步圍項三重轟然大潰羣凶四滅京師少長俱稱萬歲長安酒食於此價高九縣雲開六合清朗矧伊黔首誰不載躍伏惟陛下吐痛茹哀嬰憤忍酷自紫庭絳闕胡塵四起壘垣好時翼馬雲屯泣血臨兵嘗膽誓衆而吳楚一家方與七國俱反管蔡流言又以三監作亂西涼義衆阻秦塞而不通并州遺黎跨飛狐而見絕豺狼當

路非止一人鯨鯢不梟倏焉五載英武克振怨耻並雪
永尋霜露伊何可勝臣等輒依故實奉修社廟使者持
節分告園陵嗣后升遐龍輶未殯承華掩曜梓宮莫測
並卽隨由備辦禮具凶荒四海同哀六軍祖哭聖情孝
友理當感慟日者百司岳牧仰祈宸鑒以錫珪之功既
歸有道當璧之禮允屬聖明而優詔謙冲杳然凝睇飛
龍可躋而乾爻在四帝闈云叫而聞闔木闕謳歌再馳
是用翹首所以越人固執熏丹穴以求君周人樂推踰
岐山而事主漢王不卽位無以資功臣光武止蕭王豈
謂紹宗廟黃帝迷於襄城尚訪御人之道放勛寂於姑

射猶使樽俎有歸伊此儻來豈聖人所欲帝王所應不
獲已而然伏讀璽書尋諷制旨領懷物外未奉慈衷陛
下日角龍顏之姿表於徇齊之日彤雲素靈之瑞基於
應物之初博學則大哉無所與名深言則擘乎文章之
觀忠爲今德孝實動天加以英威茂略雄圖武算指麾
則丹浦不戰顧眄則阪泉自蕩地維絕而重紐天柱傾
而更植鑿河津於孟門百川復啓補穹儀以五石萬物
再生縱陛下拂衣而游廣城登嶢山而去東上羣臣安
得仰訴兆庶何所歸仁况郊祀配天屬籙禮贖齋宮清
廟匏竹不陳仰望鸞輿匪朝伊夕瞻言法駕載渴且饑

豈可久稽衆議有曠彝則舊邦凱復函洛已平高奴櫟
陽宮館雖毀濁河清渭佳氣猶存臯門有亢甘泉四敬
土圭測景仙人承露斯蓋九州之赤縣六合之樞機博
士捧圖書而稍還太常定禮儀其已立豈得不揚清誓
而赴名都具玉鑾而旋正寢昔東周旣遷鎬京遂其不
復長安一亂郊洛永以爲居夏后以萬國朝諸侯文王
以六州匡天下方之跡基百里劔杖三尺以殘楚之地
抗拒六戎一旅之卒剪夷三叛坦然大定御辯東歸解
五牛於冀州秣六馬於譙郡緬求前古其可得歎對揚
天命無所讓德有理存焉敢重祈奏帝尚未從辛卯宣
猛將軍朱買臣奉帝密旨害豫章王棟及其二弟橋摻
四月乙巳益州刺史新除假黃鉞太尉武陵王紀僭位
於蜀年號天正帝遣兼司空蕭泰祠部尚書樂子雲拜
謁瑩陵修復社廟丁巳下令解嚴五月庚午司空南平
王恪及宗室王侯大都督王僧辯等復拜表上尊號帝
猶固讓甲申以開府儀同三司江州刺史王僧辯爲司
徒乙酉斬賊左僕射王偉尚書呂季略少府卿周石珍
舍人嚴亶於江陵市乃下令赦境內齊將潘樂辛術等
攻秦郡王僧辯遣將杜蒯帥衆拒之以陳霸先爲征北
大將軍開府儀同三司徐州刺史齊人賀平侯景八月

武陵王紀率巴蜀之衆東下遣護軍將軍陸法和屯巴
峽以拒之九月甲戌司空南平王恪薨十月己未前梁
州刺史蕭循自魏至江陵以爲平北將軍開府儀同三
司戊申執湘州刺史王琳於殿內夷茂琳長史陸納及
其將潘烏累等舉兵反攻陷湘州是月四方征鎮王公
卿士復勸進表三上乃許之冬十一月丙子皇帝卽位
於江陵改太清六年爲承聖元年逋租宿責並許弘宥
孝子順孫悉皆賜爵長徒鎮士特加原有禁錮奪勞一
皆曠蕩是日帝不升正殿公卿陪列而已時有兩日俱
見己卯立王太子方矩爲皇太子改名元良立皇子方

智爲晉安郡王方略爲始安郡王追尊所生妣阮脩容
爲文宣太后改諡忠壯太子爲武烈太子封武烈子莊
爲永嘉王是月陸納遣將軍潘烏累等破衡州刺史丁
道貴於淶口道貴走零陵十二月陸納分兵襲巴陵湘
州刺史蕭循擊走之天門山獲野人出山三日而死星
隕吳郡淮南有野象數百壞人室廬宣城郡猛獸暴食
人是歲魏廢帝元年

二年春正月乙丑詔王僧辯討陸納戊寅以吏部尚書
王褒爲尚書僕射己卯江夏宮南門篝火飛三月庚寅
有兩龍見湘州西江夏五月甲申魏大將尉遲迥進兵

通巴西潼州刺史楊乾運以城納迴巳丑武陵王紀軍
至西陵六月乙卯王僧辯平湘州秋七月武陵王紀衆
大潰見殺八月戊戌尉遲迥平蜀九月齊遣郭元建及
將邢杲遠步大汗薩東方老帥衆頓合肥冬十一月辛
酉僧辯留鎮姑熟豫州刺史侯瑱據東關壘徵吳興太
守裴之橫帥衆繼之戊戌以尚書僕射王褒爲左僕射
湘東太守張綰爲右僕射十二月宿豫土人東方光據
城歸北齊江西州郡皆起兵應之

三年春正月魏帝爲相安定公所廢而立齊王廓是爲
恭帝元年三月主衣庫見黑蛇長丈許數十小蛇隨之
見大蛇盤屈於前羣小蛇遶之並黑色帝惡之宮人曰
此非怪也恐是錢龍帝敕所司卽日取數千萬錢鎮於
蛇處以厭之因設法會赦囚徒振窮乏退居栖心省又
有蛇從屋墮落帝帽上忽然便失又龍光殿上所御肩
輿復見小蛇縈屈輿中以頭駕夾膝前金龍頭上見人
走去逐之不及城濠中龍騰出煥爛五色竦躍入雲六
七小龍相隨飛去羣魚騰躍墜死於陸道龍處爲窟若
數百斛圖舊大城上常有紫氣至時稍復消歇甲辰以
司徒王僧辯爲太尉車騎大將軍戊申以護軍將軍鄧

州刺史陸法和爲司徒夏四月癸酉以征北大將軍開
府儀同三司陳霸先爲司空六月癸未有大黑氣如龍見
于殿內秋九月辛卯帝於龍光殿述老子義先是魏使
宇文仁恕來聘齊使又至江陵帝接仁恕有闕魏相安
定公憾焉乙巳使柱國萬紐于謹來攻冬十月丙寅魏
軍至襄陽梁王蕭詧率衆會之丁卯停講內外戒嚴與
駕出行城柵大風拔木丙子續講百寮戎服以聽詔徵
王僧辯十一月甲申幸津陽門講武置南北兩城主帝
親觀閱風雨總集部分未交旗幟飄亂帝趣駕而回無
復次序風雨隨息衆竊驚焉乙酉以領軍胡僧祐爲都
督城東城北諸軍事右僕射張綰爲副左僕射王褒都
督城西城南諸軍事直殿省元景亮爲副丁亥魏軍至
柵下丙申徵廣州刺史王琳入援丁酉大風城內火燒
居人數千家以爲失在婦人斬首尸之是日帝猶賦詩
不廢以胡僧祐爲開府儀同三司庚子信州刺史徐世
譜晉安王司馬任約軍次馬頭岸是夜有流星墜城中
帝援著筮之卦成取龜式驗之因抵于地曰吾若死此
下豈非命乎因裂帛爲書催僧辯曰吾忍死待公可以
至矣戊申胡僧祐朱買臣等出戰買臣敗績辛亥魏軍
大攻帝出柵門親臨陣督戰僧祐中流矢薨軍敗友

者斬西門守卒以納魏軍帝見執如梁王蕭譽營甚見
詰辱他日乃見魏僕射長孫儉誦儉云埋金千斤於城
內欲以相贈儉乃將帝入城帝因述譽相辱狀謂儉曰
向聊相誦欲言耳豈有天子自埋金乎儉乃留帝於主
衣庫十二月丙辰徐世譜任約退成巴陵辛未魏人戕
帝明年四月梁王方智承制追尊爲元皇帝廟號世祖
帝聰悟俊朗天才英發出言爲論音響若鍾年五六歲
武帝嘗問所讀書對曰能誦曲禮武帝使誦之卽誦上
篇左右莫不驚歎初生患眼醫療必增武帝自下意療
之遂盲一目乃憶先夢彌加愍愛及長好學博極羣書

武帝嘗問曰孫策在江東于時年幾荅曰十七武帝曰
正是汝年帝性不好聲色頗慕高名爲荊州刺史起州
學宣尼廟嘗置儒林參軍一人勸學從事二人生三十
人加廩餼帝工書善畫自圖宣尼像爲之贊而書之特
人謂之三絕與裴子野劉顯蕭子雲張纘及當時才秀
爲布衣交常自比諸葛亮桓温惟纘許焉性好矯飾多
猜忌於名無所假人微有勝已者必加毀害帝姑義興
昭長公主子王銓兄弟八九人有盛名帝妬害其美遂
改寵姬王氏兄王珣名琳以同其父名忌劉之遴學使
人鳩之如此者甚衆雖骨肉亦徧被其禍始居文宣太

后憂依丁蘭作木母及武帝崩祕喪逾年乃發凶問方刻檀爲像置于百福殿內事之甚謹朝夕進蔬食動靜必啓聞迹其虛矯如此性愛書籍既患目多不自執卷置讀書左右番次上直晝夜爲常略無休已雖睡卷猶不釋五人各伺一更恒致達曉常眠熟大斲左右有睡讀失次第或偷卷度紙帝必驚覺更令追讀加以櫛楚雖戎略殷湊機務繁多軍書羽檄文章詔誥點毫便就殆不游手常曰我輅於文士愧於武夫論者以爲得言始在尋陽夢人曰天下將亂王必維之又背生黑子巫覡見曰此大貴不可言初武帝勅賀革爲帝府諮議使

議三禮革西上意甚不悅過別御史中丞江革江革告之曰吾嘗夢主上徧見諸子至湘東王脫帽授之此人後必當璧卿其行乎革領之及太清之禍遂膺歸運自侯景之難州郡大半入魏自巴陵以下至建康緣以長江爲限荆州界北盡武寧西拒峽口自嶺以南復爲蕭勃所據文軌所同千里而近人戶著籍不盈三萬中興之盛盡於是矣武陵之平議者欲因其舟艦遷都建鄴宗悛黃羅漢皆楚人不願移帝及胡僧祐亦俱未欲動僕射王褒左戶尚書周弘正驟言卽楚非便宗悛及御史大夫劉懿以爲建鄴王氣已盡且渚宮洲已滿百於

是乃留尋而歲星在井熒惑守心帝觀之慨然而謂朝
臣文武曰吾觀玄象將恐有賊但吉凶在我運數由天
避之何益及魏軍逼關人朱買臣按劔進曰惟有斬宗
慄黃羅漢可以謝天下帝曰曩實吾意宗黃何罪二人
退入於人中及魏人燒柵買臣謝荅仁勸帝乘暗潰圍
出就任約帝素不便馳馬曰事必無成徒增辱耳荅仁
又求自將帝以問僕射王褒褒曰荅仁侯景之黨豈是
可信成彼之動不如降也乃聚圖書十餘萬卷盡燒之
荅仁又請守子城收兵可得五千人帝然之卽授城內
大都督以帝鼓吹給之配以公主旣而又召王褒謀之
荅仁請入不得歐血而去遂使皇太子王褒出質請
有頃黃門郎裴政犯門而出帝乘白馬素衣出東門抽
劔擊闔曰蕭世誠一至此乎魏師至凡二十八日徵兵
四方未至而城見剋在幽逼求酒飲之製詩四絕其一
曰南風且絕唱西陵最可悲今日遺蒿里終非封禪時
其二曰人世逢百六天道異貞恒何言異螻蟻一旦損
鷄鵬其三曰松風侵曉哀霜零當夜來寂寥千載後誰
畏軒轅臺其四曰夜長無歲月安知秋與春原陵五樹
杏空得動耕人梁王譽遣尚書傅準監行刑帝謂之曰
卿幸爲我宣行準捧詩流淚不能禁進土囊而殞之梁

王蒼使以布把纏屍斂以蒲席東以白茅以車一乘葬于津陽門外愍懷太子元良及始安王方略等皆見害徐世譜任約自馬頭走巴陵約後降于齊將軍裴畿畿弟機並被害謝朓任三人相抱俱見屠汝南王大封尚書左僕射王褒以下並爲俘以歸長安乃選百姓男女數萬口分爲奴婢小弱者俱殺之帝於伎術無所不該嘗不得南信筮之遇剝之艮曰南信已至今當遣左右季心往看果如所說賓客咸驚其妙凡所占決皆然初從劉景受相術因訊以年合口未至五十當有小厄禳之可免帝自勉曰苟有期會禳之何益及是四十七矣

特多禁忌墻壁崩倒屋宇傾頽年月不便終不修廟庭草蕪沒令鞭去之其慎護如此著孝德傳忠臣傳各三十卷丹陽尹傳十卷注漢書一百十五卷周易講疏十卷內典博要百卷連山三十卷詞林三卷玉韜金樓子補關子各十卷老子講疏四卷心懷舊傳二卷古今全德志荆南地記貢職圖古今同姓名錄一卷筮經十二卷式贊三卷文集五十卷初承聖二年三月有二龍自南郡城西升天百姓聚觀五采分明江陵故老竊相泣曰昔年龍出建康淮西天下大亂今復有焉禍至無日矣帝聞而惡之踰年而遘禍又江陵先有九十九洲古老

相承云洲滿百當出天子桓玄之爲荊州刺史內懷篡
逆之心乃遣鑿破一洲以應百數隨而崩散竟無所成
宋文帝爲宜都王在藩一洲自立俄而文帝纂統後遇
元凶之禍此洲還沒太清末枝江楊之閣浦復生一洲
羣公上疏稱慶明年而帝卽位承聖末其洲與大岸相
通惟九十九云

敬皇帝諱方智字慧相小字法真元帝第九子也太清
三年封興梁侯承聖元年封晉安郡王二年出爲江州
刺史三年十一月魏剋江陵太尉王僧辯司空陳霸先
定議以帝爲梁王太宰承制四年二月癸丑於江州奉

迎至建鄴入居朝堂以太尉王僧辯爲中書監錄尚書
驍騎大將軍都督中外諸軍事加司空陳霸先班劍二
千人以湘州刺史蕭循爲太尉廣州刺史蕭勃爲司徒
三月齊遣其上黨王高渙送貞陽侯蕭明來主梁嗣至
東關遣吳興太守裴之橫拒之與戰敗績死之四月司
徒陸法和以郢州附齊遣江州刺史侯瑱討之七月辛
丑僧辯納貞陽侯蕭明自采石濟江甲辰入建鄴丙午
卽僞位年號天成以帝爲皇太子司空陳霸先襲殺王
僧辯黜蕭明而奉帝焉

紹泰元年秋九月丙午皇帝卽位冬十月己巳大赦改

元以貞陽侯蕭明爲司徒封建安郡公壬子加司空陳
霸先尚書令都督中外諸軍事震州刺史杜龕舉兵攻
信武將軍陳蒨於長城義興太守韋載應之癸丑以太
尉蕭循爲太保以司徒蕭明爲太傅司徒蕭勃爲太尉
以鎮南將軍王琳爲車騎將軍開府儀同三司戊午尊
所生夏貴妃爲皇太后立妃王氏爲皇后辛未司空陳
霸先東討韋載降之丙子南豫州刺史任約譙秦二州
刺史徐嗣徽舉兵據石頭及十一月庚辰齊安州刺史
翟子崇楚州刺史柳達摩率衆赴任約入石頭十二月
庚戌任約徐嗣徽等至采石迎齊援丙辰遣猛烈將軍
侯安都於江寧邀擊敗之約嗣徽等奔江西庚申翟子
崇等降並放還北

太平元年春正月戊寅大赦追贈謚簡文帝諸子封故
永安侯確子後爲邵陵王奉攜王後癸未震州刺史杜
龕降詔賜死赦吳興郡己亥以太保宜豐侯蕭循襲封
鄱陽王東揚州刺史張彪圍臨海太守王懷振於剡岩
二月庚戌遣周文育陳蒨襲會稽討彪敗走以中衛將
軍臨川王大款卽本號開府儀同三司丙辰若邪村人
斬張彪傳首建鄴赦東揚州甲子以東土經社龕張彪
之亂遣大使巡省是月齊人來聘使侍中王廓報聘三

月壬午班下遠近並雜用今古錢戊戌齊將蕭軌出柵
口向梁山陳霸先大敗之夏四月壬申侯安都輕兵襲
齊行臺司馬恭於歷陽大破之五月癸未太傅建安公
蕭明薨庚寅齊軍水步入丹陽縣內外纂嚴六月壬子
齊軍至玄武湖西北乙卯陳霸先大破齊軍戊午大赦
辛酉解嚴秋七月丙子司空陳霸先進位司徒丁亥以
開府儀同三司侯瑱爲司空八月己酉太保鄱陽王循
薨九月壬寅大赦改元司徒陳霸先進位丞相錄尚書
事改封義興郡公加中權將軍壬沖開府儀同三司以
吏部尚書王通爲尚書右僕射冬十月乙亥魏相安定
公薨十一月起雲龍神武門十二月壬申進太尉蕭勃
爲太保甲午封前壽昌令劉叡爲汝陰王前鎮西法曹
行參軍蕭沈爲巴陵王奉宋齊二代後庚子魏恭帝遜
位于周

二年春正月壬寅詔求魯國孔氏族爲奉聖侯并繕廟
堂供備祀典又詔諸州各置中正舊放舉選不得輒承
舉狀序官皆須中正押上然後量授其選中正每求者
德該悉以他官領之以開府儀同三司王琳爲司空以
尚書右僕射王通爲左僕射二月庚午遣領軍將軍徐
度入東關太保廣州刺史蕭勃舉兵反詔平西將軍周

文育平南將軍侯安都等南討戊子徐度至合肥燒齊
船船三千艘癸巳周文育軍於巴山獲蕭勃偽帥歐陽
顛三月甲寅德州刺史陳法武前衡州刺史譚遠於始
興攻殺蕭勃夏四月癸酉曲赦江廣衡三州并督內爲
賊所拘逼者巳卯鑄四柱錢一當二十齊遣使通和壬
辰改四柱錢一當十丙申復用細錢五月乙巳平西將
軍周文育進號鎮南將軍平南將軍侯安都進號鎮北
將軍並開府儀同三司戊辰余孝頃遣使詣丞相府求
降秋八月加丞相陳霸先殊禮九月周冢宰宇文護殺
閔帝丞相陳霸先改授相國封陳國公冬十月戊辰進

陳國公爵爲王辛未帝遜位于陳陳受命奉帝爲江陰
王薨于外邸時年十六追諡敬皇帝

論曰帝王之位天下之重職文武之道守國所常遵其
於行用義均水火相資則可專任成亂觀夫有梁諸帝
皆一之而已簡文文明之姿稟乎天授粵自支庶入居
明兩經國之算其道弗聞宮體所傳且變朝野雖主虛
號何救滅亡元帝居勢勝之地啓中興之業旣雪讐耻
且應天人而內積猜忍外崇矯飾攀號之節忍酷於踰
年定省之制申請於木偶竟而雍州引寇釁起河東之
戮益部親尋事習邵陵之窘悖辭屈於僧辯殘虐極於

圓正不義不昵若斯之甚而復謀無經遠心勞志大近
捨宗國遠迫強隣外弛藩籬內崇講肄卒於溢至戕隕
方追始皇之迹雖復文籍滿腹何救社廟之墟歷觀書
契以來蓋亦廢興代有未見三葉遘愍頓若蕭宗之酷
敬皇以此冲年當斯頽運將不高揖其可得乎初武帝
末年都下用錢每百皆除其九謂爲九佰竟而有侯景
之亂及江陵將覆每百復除六文稱爲六佰識者以爲
九者陽九六者百六蓋符歷數非人事也善乎鄭文貞
公論之曰高祖固天攸縱聰明稽古道亞生知學爲博
物允文允武多藝多才兼自諸生有不羈之度屬昏凶

肆虐天倫及禍糾合義旅將雪家寃日紂可伐不期而
會龍躍樊漢電擊湘郢翦離德如振槁取獨夫如拾遺
其雄才大略固無得而稱矣旣懸白旗之首方應皇天
之眷布德施惠悅近來遠開蕩蕩之王道華靡靡之商
俗大修文教盛飾禮容鼓扇玄風闡揚儒業介胄仁義
折衝尊俎聲振寰宇澤流遐裔干戈載戢凡數十年濟
濟焉洋洋焉魏晉以來未有若斯之盛也然不能息末
敦本斷彫爲樸慕名好事崇尚浮華抑揚孔墨流連釋
老或終夜不寢或日軒不食非弘道以利物惟飾智以
驚愚且心未遺繁虛劇蒼頭之伍高談脫屣終戀黃塵

之尊夫人之大欲在乎飲食男女至於軒冕殿堂非有
切身之急高祖屏除嗜欲眷戀軒冕得其所難而滯於
所易可謂神有所不達智有所不通矣逮夫精華稍竭
鳳德已衰惑於聽受權在奸佞儲后百辟莫能盡言險
躁之心暮年逾甚見利而動復諫違卜開門揖盜棄好
卽讐釁起蕭牆禍成戎羯身殞非命災被億兆衣冠斃
鋒鏑之下老幼紛戎馬之足瞻彼黍離痛深周廟永言
麥秀悲甚殷墟自古以安爲危旣成而敗顛覆之速書
契所未聞也易曰天之所助者順人之所助者信高祖
之遇斯屯剝不得其死蓋動而之險不曰信順失天人
之助其能免於此乎太宗斂叡過人神采秀發多聞
達富贍詞藻然文艷用寡華而不實體窮淫麗義罕疎
通哀思之音遂移風俗以此而貞萬國異乎周誦漢莊
矣我生不辰載離多難桀逆構扇巨猾滔天始同瀟里
之拘終類望夷之禍悠悠蒼昊其可問哉昔國步初屯
兵纏魏闕羣后釋位投袂勤王元帝以盤石之宗受分
陝之任屬君親之難居連率之長不能撫劍嘗膽枕戈
泣血躬先士卒致命前驅遂乃擁衆逡巡內懷歛望坐
觀國變以爲身幸不急莽卓之誅先行昆弟之戮又沈
猜忍酷多行無禮騁智辯以飾非肆忿戾以害物爪牙

重將心膂謀臣或顧眄以就徇囚或一言而及葢臨朝
之君子相顧慄然自謂安若太山算無遺策怵於邪說
卽安荆楚雖元惡克翦社稷未寧而西隣責言禍敗旋
及斯乃上靈降鑒此焉假手天道人事其可誣乎其篤
志藝文採浮華而棄忠信戎昭果毅先骨肉而後寇讐
口誦六經心通百氏有仲尼之學有公旦之才適足以
益其驕矜增其禍患何補金陵之覆沒救江陵之滅亡
哉敬帝遭家不造紹茲屯運征伐有所自出政刑不由
於已時無伊霍之輔焉得不爲高讓歟

南史卷八 終

南史卷九

陳本紀上第九

李延壽 撰

陳高祖武皇帝諱霸先字興國小字法生吳興長城下
若里人姓陳氏其本甚微自云漢太丘長寔之後也寔
玄孫晉太尉準準生匡匡生達永嘉中南遷爲丞相掾
太子洗馬出爲長城令悅其山水遂家焉嘗謂所親曰
此地山川秀麗當有王者興焉二百年後我子孫必鍾

康熙十五年重修

南史卷九

本紀

一

斯運達生康復爲丞相掾咸和中土斷故爲長城人康
生盱眙太守英英生尚書郎公弼公弼生步兵校尉鼎
鼎生散騎侍郎高高生懷安令詠詠生安成太守猛猛
生太常卿道巨道巨生皇考文讚帝以梁天監二年癸
未歲生少儻有大志長於謀略意氣雄傑不事生產
及長涉獵史籍好讀兵書明緯候孤虛遁甲之術多武
藝明達果斷爲當時推服身長七尺五寸日角龍顏垂
手過膝嘗游義興館於許氏夢天開數丈有四人朱衣
捧日而至納之帝口及覺腹內猶熱帝心獨喜初仕鄉
爲里司後至建鄴爲油庫吏徙爲新喻侯蕭映傳教勤

於其事爲映所賞及映爲吳興太守甚重帝謂僚佐曰
此人將來遠大必勝於我及映爲廣州帝爲中直兵參
軍隨之鎮映令帝招集士馬先是武林侯蕭諮爲交州
刺史以嚴刻失和上人李賁連結數州豪傑同時反臺
遣高州刺史孫罔新州刺史盧子雄將兵擊賁罔等不
時進皆於廣州伏誅子雄弟子略與罔子姪及其主帥
杜天合杜僧明共舉兵執南江督護沈顛進寇廣州晝
夜苦攻州中震恐帝率精兵救之賊衆大潰僧明後有
功業遂降梁武帝深歎異焉授直閣將軍封新枋縣子
仍遣圖帝貌而觀之其年冬蕭映卒明年帝送喪還至

大庾嶺會有詔以帝爲交州司馬與刺史楊暕南討帝益招勇敢器械精利暕委帝經略時蕭勃爲定州刺史於西江相會勃知軍士憚遠役因詭說留暕暕集諸將問計帝曰交阯叛渙罪由宗室節下奉辭伐罪故當死生以之於是鼓行而進軍至交州暕推帝爲前鋒所向摧陷賁竄入屈獠洞中屈獠斬賁傳首建鄴是歲太清元年也賁兄天寶遁入九真與劫帥李紹隆收餘兵殺德州刺史陳文戒進圍愛州帝討平之除西江督護高要太守督七郡諸軍事二年冬侯景寇逼帝將赴援廣州刺史元景仲陰將圖帝帝知之與成州刺史王懷明等集兵於南海馳檄以討景仲景仲縊於閣下帝迎蕭勃鎮廣州特臨賀內史歐陽頔監衡州蘭裕蘭京禮扇誘始興等十郡共攻頔頔請援於勃勃令帝救之悉禽裕等仍監始興郡事帝遣杜僧明胡穎將二千人頓于嶺上并厚結始興豪傑同謀義舉侯安都張偲等率衆來附蕭勃聞之遣鍾休悅說停帝帝泣謂休悅曰君辱臣死誰敢愛命僕行計決矣時蔡路養起兵據南康勃遣腹心譚世遠爲曲江令與路養相結同逼義軍大寶元年正月帝發始興次大庾嶺大破路養軍進頓南康相東王繹承制授帝交州刺史改封南野縣伯於是修

理崎頭古城徙居之劉惠騫等望見恒有紫氣冒城上
遠近驚異故惠騫等深自結於帝尋改封長城縣侯南
江州刺史時寧都人劉藹等資高州刺史李遷仕舟艦
兵仗將襲南康帝遣杜僧明等據白口禦之二年僧明
禽遷仕送南康斬之承制授帝江州刺史帝發南康瀨
石舊有二十四灘灘多巨石行旅以爲難帝之發水暴
起數丈三百里間巨石皆沒進軍頓西昌有龍見水濱
高五丈五采鮮曜軍人觀者數萬人帝又嘗獨坐胡牀
於閣下忽有神光滿閣廊廡之間並得相見趙知禮侍
側怪而問帝笑不答時承制遣征東將軍王僧辯督

衆軍討侯景次益城帝率杜僧明等合三萬將會焉時
西軍乏食帝先計軍糧五十萬石至是分三十萬石以
資之仍頓巴丘會侯景廢簡文立豫章嗣王棟帝遣兼
長史沈袞奉表於江陵勸進承制授帝東揚州刺史領
會稽太守三年帝帥師發自豫章二月次桑落洲時僧
辯已發益城會帝于白茅灣乃登岸結壇刑牲盟約進
次大雷軍人杜稜夢雷池君周何神自稱征討大將軍
乘朱航陳甲仗稱下征侯景須臾便還云已殺景竟三
月帝與諸軍進剋姑熟仍次蔡洲侯景登石頭城望官
軍之盛不悅曰一把子人何足可打密謂左右曰此軍

南史卷九
本紀
四
上有紫氣不易可當乃以般舫貯石沈塞淮口綠淮作
城自石頭迄青溪十餘里中樓雉相接僧辯遣杜勣開
計於帝帝以諸將不敢當鋒請先往立柵卽於石頭西
橫壠築柵衆軍次連八城直出東北賊恐西州路斷亦
於東北果林作五城以遏大路帝曰善用兵者如常山
之蛇使救首救尾困而無暇今我師旣衆賊徒甚寡應
分賊兵力以弱制彊乃命諸將分處置兵帝與王琳杜
龕等悉力乘之景衆大潰僧辯啓命帝鎮京口五月齊
遣將辛術圍嚴超達于秦郡帝命徐度領兵助其固守
齊衆起土山穿地道攻之甚急帝乃自率萬人解其圍

振旅南歸承制授帝征北大將軍開府儀同三司南徐
州刺史進封長城縣公及王僧辯征陸納於湘州承制
命帝代鎮揚州承聖二年湘州平帝旋鎮京口三年三
月進帝位司空及魏平江陵帝與王僧辯等進啓請晉
安王以太宰承制十二月晉安王至自尋陽入居朝堂
給帝班劔二十人四年五月齊送貞陽侯明還主社稷
王僧辯納之明卽位改元天成以晉安王爲皇太子初
齊之納貞陽也帝固爭之以爲不可不見從帝居常憤
歎曰嗣主高祖之孫元皇之子竟有何事坐致廢黜假
立非次此情可知乃密具袍數千領及錦綿金銀以爲

賞賜之資九月壬寅帝召徐度侯安都周文育仍部列
將士水陸俱進夜發南徐州討王僧辯甲辰帝至石頭
前遣勇士自城北踰入時僧辯方視事聞外自有兵遽
走帝大兵尋至因風縱火僧辯就禽是夜縊之及其子
頴於是廢貞陽侯而奉晉安王卽位改承聖四年爲紹
泰元年壬子詔授帝侍中大都督中外諸軍事車騎將
軍揚南徐二州刺史持節司空班劔鼓吹並如故仍詔
甲仗百人出入殿省震州刺史杜龕據吳興與義興太
守韋載舉兵逆命辛未帝表自東討留高州刺史侯安
都石州刺史杜稜宿衛臺省甲戌軍至義興秦州刺史
徐嗣徽據城入齊又要南豫州刺史任約舉兵應龕齊
人資其兵食嗣徽乘虛奄至闕下侯安都出戰嗣徽等
退據石頭丁丑載及龕從弟比叟來降帝撫而釋之仍
以載兄鼎知郡事以嗣徽寇逼卷甲還都命周文育進
討杜龕十一月己卯齊遣兵五千度據姑熟又遣安州
刺史翟子崇楚州刺史劉士榮淮州刺史柳達摩領兵
萬人於胡墅度米粟三萬石馬千匹入石頭帝乃遣侯
安都領水軍夜襲胡墅燒齊船周鐵武率舟師斷齊運
輸帝領鐵騎自西明門襲之齊人大潰嗣徽留達摩等
守城自率親屬腹心往南州采石以迎齊援先是太白

自十一月丙戌不見十二月乙卯出于東方丙辰帝盡命衆軍分部甲卒對冶城日立航度兵攻其水南二柵柳達摩等度淮置陣帝督兵疾戰縱火燒柵煙塵漲天齊人大潰盡收其船艦是日嗣徽約等領齊兵還據石頭帝遣侯安都領水軍襲破之嗣徽等單舸脫走丁巳拔石頭南岸柵移度北岸起柵以絕其汲路又堙塞東門故城中諸井齊所據城中無水水一合買米一升一升米質絹一疋或炒米食之達摩謂其衆曰頃在北童謠云石頭擣兩襠謂青復擣黃侯景服青已倒於此今晉徒衣黃豈謠言駭邪庚申達摩遣侯子欽劉士榮等

請和帝許之乃於城外盟約其將士恣其南北辛酉帝出石頭南門陳兵送齊人歸北者及至齊人殺之壬戌齊和州長史烏丸遠自南州奔還歷陽江寧今陳嗣黃門待郎曹朗據姑熟不從帝命侯安都徐度等討平之聚其首爲京觀是月杜龕以城降二年正月癸未誅龕其弟翕從弟比叟司馬沈孝敦並賜死三月戊戌齊遣水軍儀同蕭軌庫狄伏連堯難宗東方老侍中裴英起東廣州刺史獨孤辟惡洛州刺史李希光并任約徐嗣徽王僧愰等衆十萬出柵口向梁山帳內盪主黃叢逆擊敗之燒其前軍船艦齊頓軍保蕪湖五月丙申齊兵

南齊書卷九
至秣陵故城巳亥帝率宗室王侯及朝臣於大司馬門
外白虎闕下刑牲告天以齊人背約發言慷慨涕泗交
流士卒觀者益奮辛丑齊軍於秣陵故城跨淮立橋柵
引度兵馬癸卯自方山進及兒塘游騎至臺都下震駭
帝潛以精卒三千配沈泰度江襲齊行臺趙彥深於瓜
步獲其舟粟六月甲辰齊兵潛至鍾山龍尾丁未進至
莫府山帝遣錢明領水軍出江乘要擊齊人糧運盡獲
之齊軍大餒殺馬驢而食之壬子齊軍至玄武湖西北
莫府山南將據北郊壇衆軍自覆舟東移頓郊壇北與
齊人相對其夜大雨震電暴風拔木平地水文餘齊軍

晝夜坐立泥中縣鬲以爨足指皆爛而臺中及湖溝北
水退路燥官軍每得番易甲寅少霽是時食盡調市人
餽軍皆是麥屑爲飯以荷葉裹而分給間以麥餅兵士
皆困會文帝遣送米三千石鴨千頭帝卽炊米煮鴨誓
中一戰士及防身計糧數衡人人裹飯混以鴨肉帝命
衆軍蓐食攻之齊軍大潰執嗣徽及其弟嗣宗斬之以
徇虜蕭軌東方老王敬寶李希光裴英起王僧智等將
帥四十六人其軍士得竄至江者縛筏以濟中江而溺
流屍至京口者彌岸惟任約王僧偕獲免先是童謠云
虜萬夫人五湖城南酒家使虜奴自晉宋以後經絰在

魏境江淮以北南人皆謂爲虜是時以賞俘買酒者一人裁得一醉丁巳衆軍出南州燒賊舟巳未斬劉歸義徐嗣產傅野豬于建康市是日解嚴庚申誅蕭軌東方老王敬寶李希光裴英起等太平元年九月壬寅帝進位丞相錄尚書事鎮衛大將軍揚州牧進封義興郡公庚申追贈皇考侍中光祿大夫封義興郡公諡曰恭十月甲戌梁帝勅丞相自今聞訊可施別榻設近晨坐二年正月壬寅詔加帝班劔十人并前爲三十丁未詔贈皇兄道談南兖州刺史長城縣公諡曰昭烈皇弟休光侍中南徐州刺史武康縣侯諡曰忠壯甲寅遣兼侍中謁者僕射陸繕策拜長城縣夫人章氏爲義興國夫人丁卯詔贈皇祖侍中太常卿諡曰孝追封皇祖妣許氏吳郡嘉興縣君諡曰敬皇妣張氏義興國太夫人諡曰宣二月庚午蕭勃舉兵自廣州度嶺頓南康遣其將歐陽頎傅泰及其子夜爲前軍至豫章分屯要險南江州刺史余孝頃起兵應勃帝命周文育侯安都率衆討平之八月甲午帝進位太傅加黃鉞劔履上殿入朝不趨贊拜不名丙申加前後部羽葆鼓吹是時湘州刺史王琳擁兵不應命遣周文育侯安都率衆討之九月辛丑梁帝進帝位相國總百揆封十郡爲陳公備九錫之禮

南史卷九
本紀
加璽紱遠游冠綠綬綬位在諸侯王上策曰大哉乾元
資日月以貞觀至哉坤元憑山川以載物故惟天爲大
陟配者欽明惟王建國翼輔者齊聖是以文武之佐
谿蘊其玉璜堯舜之臣榮河鑿其金板況乎體得一之
鴻姿寧陽九之危厄援橫流於碣石撲燎火於崑岡驅
馭於韋彭跨躐於齊晉神功行而靡用聖道運而無名
者乎今將授公典策其敬聽朕命日者昊天不弔鍾虺
于我國家網漏吞舟疆胡內鼎茫茫宇宙慄慄黎元方
趾圓顛萬不遺一太清否亢橋山之痛以深大寶屯如
平陽之禍相繼上宰膺運康救黔黎鞠旅於漠池之南

揚旌於桂嶺之北縣三光於已墜謚四海於羣飛光啓

中興此湯公上國大造於皇家者也既而天未悔禍夷醜

薦臻南夏崩騰西京蕩覆冢司昏撓旁引寇讐既見貶
於桐宮方謀危於漢閣皇運已殆何殊贅旒中國搖然
非徒如綏公赫然投袂匡救本朝復莒齊都平戎王室
朕所以還膺寶歷重履宸居挹建武之風猷歌宣王之
雅頌此又公之再造於皇家者也公應務之初登庸惟
始孫盧肇翼越豨爲災蕃部陪危勢將淪殄公赤旗所
指祆壘洞開白羽纔搗凶徒紛潰此又公之功也大同
之末邊政不修李賁狂迷竊我交愛公英暮雅算電掃

風行馳御樓船直跨滄海三山獠洞八角蠻陬逃矣水
寓之鄉悠哉火山之國馬援之所不屈陶璜之所未開
莫不懼我王靈爭朝邊候歸踪天府獻狀鴻臚此又公
之功也自寇虜陵江宮闈幽辱而番禺連率本自諸夷
言得其朋是懷同惡公仗此忠誠乘機勦定執沛令而
釁鼓平新野而據輦此又公之功也世道初艱方隅多
難公以國盜邊警知無不爲恤是同盟誅其醜類南土
黔黎重保蘇息此又公之功也長驅嶺嶠夢想京畿緣
道曾豪遞爲榛梗路養渠帥全據大都蓄聚逋逃方謀
阻亂公龍驤虎步嘯吒風雲山靡堅城野無疆陣清祇
氛於瀨石滅沴氣於零都此又公之功也遷仕凶慝屯
據大畢乞活類馬騰之軍流人多杜弢之衆公坐揮三
略遙制六奇義勇同心貔貅騁力雷奔電擊谷靜山空
列郡無犬吠之驚叢祠罷狐鳴之盜此又公之功也王
師討虜次屆淪波兵乏兼儲士有饑色公回麾彭蠡積
穀巴丘億庾之誅斯豐壺漿之昨是衆故使三軍勇銳
百戰無前承此兵糧遂殄凶逆此又公之功也益壘積
攜用淹戎略公志惟同獎師克在和屈禮交盟神祇感
咽故能使舟師並路遠邇朋心此又公之功也姑熟襟
要嶠函所憑寇虜據其關梁大盜負其禍難公一拔纜

搗三雄並奮左賢右角沙潰土崩鄂坂之隘斯開夷庚
之道無塞此又公之功也義軍大衆俱集帝京逆豎凶
徒猶屯皇邑公回茲地軸抗此天羅曾不崇朝俾無遺
噍此又公之功也內難初靜諸侯出關外郡傳烽鮮甲
犯塞公舟師步甲巨野橫江殲厥羣氏遂殄封豕此又
公之功也公克黜禍難劬勞皇室而孫齊之黨翻啓狄
人伊洛之間咸爲虜戍朝聞戎塵夜喧胡鼓公三籌既
畫八陣斯張裁舉靈鉦亦抽金僕咸俘醜類悉反高塘
此又公之功也任約叛渙梟聲不悛戎羯貪婪狼心無
改公左甄右落箕張翼針掃是攬搶驅其獫狁投秦坑
而盡沸噎澁水而不流此又公之功也一相居中自折
彝鼎五湖小守妄懷同惡公夙駕兼道秉羽杖戎玉斧
將揮金鉦且戒祇曾震懼遽請灰釘此又公之功也賊
龕凶橫陵虐具區阻兵安忍憑災怙亂公雖宗居汝穎
世寓東南眷言桑梓公私憤切戮此大憝如烹小鮮此
又公之功也同姓有扈頑凶不賓憑藉宗盟圖危社稷
公論兵於廟堂之上決勝於尊俎之間寇賈樊滕浮江
下瀾一朝翦撲無待旬師此又公之功也豫章祇寇依
憑山澤繕甲完聚多歷歲時結從連橫爰泊交廣呂嘉
既獲吳淠已縱命我還師征其不恪連營盡拔僞黨斯

禽此又公之功也自八紘九野瓜剖豆分竊帝倫王連
州比縣公武靈已暢文德又宣折簡馳書風猷斯遠此
又公之功也京師禍亂亟積寒暄雙闕抵昂九門寥豁
公求衣昧旦不食高春興構宮闈具瞻遐邇郊庠宗稷
之典六符十等之章還聞太始之風流重覩永平之遺
事此又公之功也公有濟天下之勳重之以明德凝神
體道合德符天周百姓以爲心隨萬機以成務上德不
德無爲以爲夏長春生顯仁藏用功成化洽樂奏咸雲
安上御人禮兼文質是以天無蘊寶地有呈祥旣景煥
於圖書方歲蕤於史牒高勳踰於象緯積德冠於嵩華
固無得而稱者矣朕又聞之前王宰世茂賞尊賢式樹
藩長總征羣伯二南崇絕四履遐曠泱泱表海祚土維
齊巖巖泰山俾侯于魯況復經營宇宙寧惟斷龜足之
功弘濟蒼生非直鑿龍門之險而疇庸報德寂爾無聞
朕所以垂拱當宇載懷慙悻者也今授公相國以南豫
州之陳留南丹陽宣城揚州之吳興東陽新安新寧南
徐州之義興江州之鄱陽臨川十郡封公爲陳公錫茲
青土苴以白茅爰定爾邦用建冢社昔日奠分陝俱爲
保師晉鄭諸侯咸作卿士兼其內外禮實攸宜今命使
持節兼太尉王通授相國印綬陳公璽紱使持節兼司

空王瑒授陳公茅土金虎符第一至第五左符使符第一至第十左相國秩踰三鉉任總百司位絕朝班禮由事華以相國總百揆除錄尚書之號上所假節侍中貂蟬中書監印章中外都督太傅印綬義興公印策其鎮衛大將軍揚州牧如故又加公九錫其敬聽後命以公禮爲楨榦律等銜策四維皆舉八柄有章是用錫公大輅戎輅各一玄牡二駟以公賤寶崇穀疏爵待農室富京坻人知榮辱是用錫公衮冕之服赤舄副焉以公調理陰陽變諧風雅三靈允降萬國同和是用錫公軒縣之樂六佾之舞以公宣導王猷弘開風教光景所照觀象必通是用錫公朱戶以居以公抑揚清濁褒德進賢髦士盈朝幽人虛谷是用錫公納陛以登以公嶷然廊廟爲世鎔範折衝四表臨御八荒是用錫公虎賁之士三百人以公軌茲明罰期在刑厝象恭無赦于紀必誅是用錫公斧鉞各一以公英猷遠量跨厲嵩溟包一車書括囊寰寓是用錫公彤弓一彤矢百盧弓十盧矢千以公天經地義貫徹幽明春露秋霜允供粢盛是用錫公衮冕一齒圭瓚副焉陳國置丞相以下一遵舊式往欽哉其恭循朕命克相皇天弘建邦家允興鴻業以光我高祖之休命十月戊辰又進帝爵爲王以揚州之會

稽臨海永嘉建安南徐州之晉陵信安江州之尋陽豫
章安成廬陵并前爲二十郡益封陳國其相國揚州牧
鎮衛大將軍並如故又命陳王冕十有二旒建天子旌
旗出警入蹕乘金根車駕六馬備五時副車置旒頭雲
罕樂儔八佾設鍾虞宮縣王妃王子王女爵命之號陳
臺百官一依舊典辛未梁帝禪位于陳策曰咨爾陳王
惟昔上古厥初生人驪連栗陸之前容成大庭之世杳
冥恍惚故靡得而議焉自羲農軒昊之君陶唐有虞之
主或垂衣而御四海或無爲而子萬姓居之如馭朽索
去之如脫弊屣裁遇許由便能捨帝暫逢善卷卽以讓

王故知玄冕琬璣非關尊貴金根玉節示表君臨及南
觀河渚東沈刻壁菁華旣竭耄勤已倦則抗首而笑惟
賢是與謗然作歌簡能斯授遺風餘烈昭晰圖書漢魏
因循是爲故實宋齊授受又弘斯義我高祖應期撫運
握樞御宇三后重光祖宗齊聖及時屬陽九封豕薦食
西都失馭夷狄交侵乃皇天成輕弄龜鼎慄慄黔首若
崩厥角微微皇極將甚綴旒惟王乃聖乃神欽明文思
二儀並運四時合序天錫智勇人挺雄傑珠庭日角龍
行虎步爰初投袂日適勤王電掃番禺雲撤彭蠡翦其
元惡定我京畿及王賀帝弘質茲冠履旣行伊霍用保

冲人震澤稽塗竝懷叛逆獯羯醜虜三亂皇都裁命偏
師二邦自珍薄伐獫狁六戎盡殪嶺南叛渙湘郢連結
賊帥旣禽凶渠傳首用能百揆時序四門允穆無思不
服無遠不届上達穹昊下漏淵泉蛟魚並見謳歌攸屬
況乎長彗橫天已徵布新之兆璧日斯旣寔表更姓之
符七百無常期皇王非一族昔木德旣季而傳祚于我
有梁天之歷數允集明哲式遵前典廣詢羣議王公卿
尹莫不攸屬敬從人祇之願授帝位于爾躬四海困窮
天祿永終王其允執厥中軌儀前式以副溥天之望禮
郊祀帝時膺大禮永固洪業豈不盛與又命璽書遺兼

天保尚書左僕射王通兼太尉司徒左長史王瑒奉皇
帝璽紱受終之禮一依唐虞故事是日梁帝遜于別宮
帝謙讓再三羣臣固請乃許之永定元年冬十月乙亥
皇帝卽位于南郊柴燎告天曰皇帝臣霸先敢用玄牡
昭告于皇皇后帝梁氏以圯剝薦臻歷運有極欽若天
應以命于霸先夫肇有黎蒸乃樹司牧選賢與能未常
厥姓有梁末運仍葉邁屯儻醜憑陵久移神器承聖在
外非能祀夏天未悔禍復罹寇逆鱗嗣廢黜宗枝僭詐
天地板蕩紀綱泯絕霸先爰初投袂大拯橫流重舉義
兵實戡多難廢王立帝寔有厥功安國定社用盡其力

南史卷九
是謂小康方期大道既而煙雲表色日月呈祥除舊布
新既彰玄象遷虞事夏且協謳譟九域八荒同布衣款
百神羣祀皆有誠願梁帝高謝萬邦授以大寶霸先自
惟菲薄讓德不嗣至于再三辭弗獲許僉以百姓須王
萬機難曠皇靈眷命非可謙拒畏天之威用膺嘉祚永
言夙志能無慙德敬簡元辰升壇受禪告類上帝用答
眇心永保于我有陳惟明靈尚饗先是氛霧雨雪晝夜
晦冥至是日景氣清晏禮畢輿駕還宮臨太極前殿大
赦改元賜百姓爵二級文武二等鰥寡孤獨不能自存
者人穀五斛逋租宿責皆勿復收有地論清議賊汚

淫盜者皆洗除先注與之更始其長徒勅擊特皆原之
亡官失爵禁錮奪勞一依舊典又詔以江陰郡奉梁主
爲江陰王行梁正朔車旗服色一依前準梁皇太后爲
江陰國太妃皇后爲江陰國妃又詔百司各依位攝職
丙子幸鍾山祭蔣帝廟戊寅幸華林園覽辭訟臨赦囚
徒已卯分遣大使宣勞四方庚辰詔出佛牙於杜姥宅
集四部設無遮大會辛巳追尊皇考曰景皇帝廟號太
祖皇妣董太夫人曰安皇后前夫人錢氏爲昭皇后世
子克爲孝懷太子立夫人章氏爲皇后癸未尊景帝陵
曰瑞陵昭皇后陵曰嘉陵依梁初園陵故事立刪定郎

南史卷九十一
卷九十一
刑定律令戊子遷景皇帝神主祔于太廟是月西討都督周文育侯安都於郢州敗績沒于王琳十一月丙申封皇兄子長城縣侯禧爲臨川郡王瑱襲封始興郡王皇弟子曇朗襲封南康郡王庚申都下火十二月庚辰皇后謁太廟是歲周閔帝元年及九月冢宰宇文護廢閔帝而奉明帝又爲明帝元年

二年春正月乙未以車騎將軍開府儀同三司侯瑱爲司空辛丑祀南郊大赦甲寅遣中書舍人韋鼎策吳興楚王神爲帝戊午祀明堂二月壬申南豫州刺史沈泰奔齊辛卯詔司空侯瑱總督水陸衆軍以禦齊三月王

琳立梁永嘉王蕭莊以奉梁後卽位于郢州夏四月甲子祀太廟乙丑江陰王歺陳志也追謚梁敬帝詔太宰弔祭司空監護喪事以梁武林侯蕭諮子季卿嗣爲江陰王戊辰重雲殿東鷓尾有紫煙屬天五月乙未都下地震壬寅立梁邵陵攜王廟室祭以太牢辛丑帝幸大莊嚴寺捨身壬戌羣臣表請還宮六月己巳詔司空侯瑱領軍將軍徐度討王琳初侯景之平也太極殿被焚承聖中議欲營之獨闕一柱秋七月有樟木大十八圍長四丈五尺流泊陶家後渚監軍鄒子度以聞詔中書令沈衆兼起部尚書構太極殿八月周文育侯安都等

於王琳所逃歸自劾廷尉即日引見宥之並復本官丁
亥加江州刺史周迪平南將軍開府儀同三司冬十月
庚午遣鎮南將軍周文育都督衆軍出豫章討余孝勣
乙亥幸莊嚴寺發金光明經題丁酉加高州刺史黃法
輒平南將軍開府儀同三司十二月甲子幸大莊嚴寺
設無碍大會捨乘輿法物羣臣備法駕奉迎即日還宮
丙戌加北江州刺史熊曇朗平西將軍開府儀同三司
三年春正月丁酉鎮南將軍廣州刺史歐陽頔卽本號
開府儀同三司是夜大雪及旦太極殿前有龍跡見甲
子廣州言仙人見于羅浮山寺小石樓二月辛酉加平
西將軍桂州刺史淳于量鎮西大將軍開府儀同三司
夏閏四月甲午詔依前代置西省學士兼取伎術士是
時久不雨丙午幸鍾山祭蔣帝廟是日降雨迄于月晦
五月丙辰朔日有蝕之有司奉舊儀帝御前殿服朱紗
袍通天冠詔曰此乃前代承用意有未同合朔仰助太
陽宜備袞冕之服自今永可爲準丙子扶南國遣使朝
貢乙酉北江州刺史熊曇朗殺都督周文育舉兵反王
琳遣其將常衆愛曹慶率兵援余孝勣六月戊子儀同
侯安都敗衆愛等於左里獲琳從弟襲主帥羊疎等四
十餘人衆愛遁走庚寅廬山人斬之傳首建鄴甲午衆

軍凱歸丁酉帝不豫遣兼太宰尚書右僕射王通以疾告太廟兼太宰中書令謝哲告大社南北郊辛丑帝小瘳故司空周文育之柩至自建昌壬寅帝素服哭于朝堂哀甚癸卯上臨訊獄訟是夜熒惑在天尊上疾甚丙午帝崩于璿璣殿時年五十七遺詔追臨川王舊人續大業甲寅殯于太極殿西階八月甲午羣臣上諡曰武皇帝廟號高祖丙申葬萬安陵帝雄武多英略性甚仁愛及居阿衡恒崇寬簡雅尚儉素常膳不過數品私饗曲宴皆瓦器蟬盤肴核庶羞裁令充足不爲虛費初平侯景及立敬帝子女玉帛皆班將士其充閭房者衣不重采飾無金翠聲樂不列於前踐祚之後彌厲恭儉故能隆功茂德光于江左云

世祖文皇帝諱椿字子華始興昭烈王之長子也少沈敏有識量美容儀留意經史武帝甚愛之常稱吾家英秀梁太清初帝夢兩日鬪一大一小大者光滅墜地色正黃其大如斗帝三分取一懷之侯景之亂避地臨安縣郭文舉舊宅及武帝舉兵南下景遣吳興太守信都遵收帝及衡陽獻玉出都帝乃密袖小刀候見景欲圖之及至以付郎中王翻幽守故其事不遂武帝圍石頭景欲加害者數矣會景敗乃得出起家吳興太守武帝

南史卷九
之討王僧辯也先召帝與謀時僧辯塔杜龕據吳興兵
衆甚盛武帝密令帝還長城立一柵備之龕遣將杜泰乘
虛掩至將士相視失色帝言笑自如若部分益明於是衆
心乃定及武帝遣周文育討龕帝遣將軍劉澄蔣元舉
攻下龕拜會稽太守武帝受禪立爲臨川王夢梁武帝
以寶刀授已周文育侯安都之敗於沌口武帝詔帝入
總軍政尋命率兵城南皖永定三年六月丙午武帝崩
皇后稱遺詔徵帝入纂皇統甲寅至自南皖入居中書
省皇后令帝嗣膺寶籙帝辭讓至于再三公卿固請其
日卽皇帝位於太極前殿大赦詔州郡悉停奔赴秋七

月丙辰尊皇后爲皇太后辛酉以司空侯瑱爲太尉以
南豫州刺史侯安都爲司空以南徐州刺史徐度爲侍
中中撫軍將軍開府儀同三司乙丑重雲殿災八月庚
戌立皇子伯茂爲始興王奉昭烈王後徙封始興嗣王
瑒爲安成王九月辛酉立皇子伯宗爲皇太子王公以
下賜帛各有差乙亥立妃沈氏爲皇后冬十月甲子齊
文宣帝殂十一月乙卯王琳寇大雷詔太尉侯瑱司空
侯安都儀同徐度禦之是歲周明帝改天王稱皇帝復
建年號曰武成元年
天嘉元年春正月癸丑大赦改元詔賜鰥寡孤獨不能

自存者人粟五斛孝弟力田殊行異等加爵一級甲寅
分遣使者宣勞四方辛酉祀南郊詔賜人爵一級二月
丙申太尉侯瑱敗王琳于梁山敗齊兵于博望禽齊將
劉伯球王琳及其主蕭莊奔齊庚子分遣使者齎璽書
宣勞四方乙巳遣太尉侯瑱鎮益城庚戌立武帝第六
子昌爲衡陽王三月丙辰蕭莊所署郢州刺史孫瑒舉
州內附丁巳江州刺史周迪平南中斬賊帥熊曇朗傳
首建鄴戊午齊軍棄魯山城走詔南豫州刺史程靈洗
守之丙子衡陽王昌沈于江夏四月丁亥立皇子伯信
爲衡陽王奉獻王後辛丑周明帝崩六月辛巳改諡皇
祖妣景安皇后曰景文皇后壬辰詔改葬梁元帝於江
寧舊塋車騎禮章悉用梁典仍依魏葬漢獻帝故事甲
午追策故始興昭烈王妃曰孝妃辛丑國哀周忌上臨
于太極前殿百僚陪哭赦建鄴殊死以下秋七月丙辰
立皇子伯山爲鄱陽王八月壬午齊孝昭帝廢其主殷
而自立戊子詔非兵器及國容所須金銀珠玉衣服雜
玩悉皆禁斷丁酉幸正陽堂閱武九月癸丑彗星見乙
卯周將獨孤盛領水軍趣巴湘與賀若敦水陸俱進太
尉侯瑱自尋陽禦之冬十月癸巳侯瑱襲破獨孤盛於
楊葉洲盛登岸築城自保丁酉詔司空侯安都率衆會

南史卷九
侯瑱南拒周軍十二月己亥周巴陵城主尉遲憲降庚子獨孤盛潛遁走

二年春正月庚戌大赦辛未周湘州城主殷亮降湘州平二月庚寅出赦湘州諸郡三月乙卯太尉湘州刺史侯瑱薨夏六月己亥齊人通好秋七月丙午周將賀若敦遁歸武陵天門南平義陽河東宜都郡悉平九月甲寅詔以故太尉侯瑱故司空周文育故開府儀同三司杜僧明故中護軍胡頴故領軍陳擬配食武帝廟庭冬十月癸丑霍州西山蠻率部內屬乙卯高麗國遣使朝貢十一月甲辰齊孝昭帝殂十二月甲申立始興國廟于都下用王者禮以國用不足立煮海鹽傳及榷酤科先是緡州刺史留異應王琳丙戌詔司空侯安都討之是歲周武帝保定元年

三年春正月庚戌設帷宮於南郊幣告胡公以配天辛亥祀南郊詔賜人爵一級孝弟方田加一等二月梁宣帝殂閏月己酉以百濟王餘明爲撫東大將軍高麗王高湯爲寧東將軍江州刺史周迪舉兵應留異甲子改鑄五銖錢三月丙子安成王頊至自周丁丑以安右將軍吳明徹爲安南將軍江州刺史督衆軍南討甲申大赦庚寅司空侯安都破留異於姚支嶺異奔晉安東陽

郡平夏四月癸卯曲赦東陽郡乙巳齊人來聘秋七月
巳丑皇太子納妃王氏在位文武賜帛各有差孝弟力
田爲父後者賜爵二級九月戊辰朔日有蝕之以待中
到仲舉爲尚書右僕射丁亥周迪請降

四年春正月丙子于阗利國遣使朝貢甲申周迪走投
閩州刺史陳寶應納之夏四月辛丑設無碍大會捨身
於太極前殿乙卯加驃騎將軍揚州刺史安成王瑒開
府儀同三司六月癸巳司空侯安都賜死秋九月壬戌
開府儀同三司廣州刺史歐陽頔薨癸亥曲赦都下辛
未周迪復寇臨川詔護軍將軍章昭達討平之冬十二

月丙申大赦詔昭達進軍建安討陳寶應

五年春三月壬午詔以故護軍將軍周鐵虎配食武帝
廟庭夏五月周齊並遣使來聘秋七月丁丑曲赦都下
九月城西戒冬十一月巳丑章昭達禽陳寶應留異送
建鄴晉安郡平甲辰以護軍將軍章昭達爲鎮軍將軍
開府儀同三司十二月甲子曲赦建安晉安二郡討陳
寶應將士死王事者並給棺槨送還本鄉并復其家癸
未齊人來聘

六年春正月甲午皇太子加元服王公以下賜帛各有
差孝弟力田爲父後者賜爵一級鰥寡孤獨不能自存

者殷人五斛夏四月甲寅以開府儀同三司揚州刺史
安成王頊爲司空五月齊武成帝傳位於太子緯自號
太上皇帝六月辛酉彗星見于上台北周人來聘秋七
月癸未有大風自西南至廣百餘步激壞靈臺候樓甲
申儀賢堂無故自壞丙戌臨川太守駱牙斬周迪傳首
建鄴梟於朱雀航八月己卯立皇子伯固爲新安王伯
恭爲晉安王伯仁爲廬陵王伯義爲江夏王九月新作
大航冬十月辛亥齊人來聘十二月乙卯立皇子伯禮
爲武陵王癸亥曲赦都下

天康元年春二月丙子大赦改元三月己卯以司空安

成王頊爲尚書令夏四月乙卯皇孫至澤生賜在位文
武帝各有差爲父後者賜爵一級癸酉皇帝崩于有覺
殿遺詔皇太子可卽君臨山陵務存儉速大斂竟羣臣
三日一臨公除之制率依舊典六月甲子羣臣上諡曰
文皇帝廟號世祖丙寅葬永寧陵文帝起自布衣知百
姓疾苦國家資用務從儉約妙識真僞下不容姦一夜
內刺閹取外事分判者前後相續每雞人伺漏傳籤於
殿中者令投籤於階石上鎗然有聲云吾雖得眠亦令
驚覺其自彊若此云

廢帝諱伯宗字奉業小字藥王文帝嫡長子也梁承聖

三年五月庚寅生末定二年二月戊辰拜臨川王世子
三年文帝嗣位八月庚戌立爲皇太子自梁室亂離東
宮焚燼太子居于永福省天康元年四月癸酉文帝崩
是日太子卽皇帝位于太極前殿大赦詔内外文武各
復其職遠方悉停奔赴五月己卯尊皇太后曰太皇太
后皇后曰皇太后庚寅以司空揚州刺史新除尚書令
安成王頊爲司徒錄尚書都督中外諸軍事丁酉以中
軍大將軍開府儀同三司徐度爲司空以鎮東將軍東
揚州刺史始興王伯茂爲征東將軍開府儀同三司以
吏部尚書袁樞爲尚書左僕射以吳興太守沈欽爲右
僕射秋七月丁酉立妃王氏爲皇后冬十月庚申享太
廟十一月乙亥周人來弔十二月甲子高麗國遣使朝
貢是歲周天和元年

光大元年春正月癸酉尚書左僕射袁樞卒乙亥大赦
改元賜孝弟力田爵一級辛卯祀南郊二月辛亥南豫
州刺史余孝頃謀反伏誅三月甲午以尚書右僕射沈
欽爲侍中尚書僕射夏五月乙未湘州刺史華皎不從
執政丙申以中撫軍大將軍淳于量爲征南大將軍總
舟師討之六月壬寅以中軍大將軍司空徐度爲車騎
將軍總督都下衆軍自步道襲湘州秋七月戊申立皇

子至澤爲皇太子賜天下爲父後者爵一級王公以下
賚帛各有差九月丙辰百濟國遣使朝貢是月周將拓
拔定入郢州與華皎水陸俱進都督淳于量吳明徹等
大破之皎單舸奔江陵禽定送建鄴冬十月辛巳曲赦
湘巴二州爲皎所誣誤者十一月甲子中權將軍開府
儀同三司王冲薨十二月庚寅以儀同三司兼從事中
郎孔英哲爲奉聖亭侯奉孔子祀

二年春正月己亥司徒安成王頊進位太傅領司徒加
殊禮以新除征南大將軍淳于量爲中軍大將軍及安
南將軍湘州刺史吳明徹卽本號並開府儀同三司庚
子詔討華皎軍人死王事者並給棺槨送還本鄉仍復
其家甲子司空徐度薨夏五月丙辰太傅安成王頊獻
玉璽一六月丁亥彗星見秋七月戊申新羅國遣使朝
貢壬戌立皇弟伯智爲永陽王伯謀爲桂陽王九月林
邑狼牙脩國並遣使朝貢冬十一月甲寅慈訓太后令
曰伯宗昔在儲宮本無令問及居崇極遂騁凶淫太傅
親承顧託義深垣屏而攢塗未御翌日無淹仍遣劉師
知殷不佞等顯言排斥陰謀禍亂賴元相維持但除君
側又以余孝頃密邇京師便相徵召宗社之靈祚氣是
滅於是密謂華皎稱兵上流國祚憂惶幾移醜類又別

南史卷九
勃歐陽紇等攻逼衡州嶺表紛紜殊淹弦望但賊豎皆
亡日望懲改而悖禮忘德情性不悛盪主侯法喜等太
傅麾下恒游府內啗以深利謀與肘腋又盪主孫泰等
潛相連結大有交通天誘其衷自然開發比諸文迹今
以相示豈可復肅恭禋祀臨御生靈今可特降爲臨海
郡王送還藩邸太傅安成王固天生德齊聖廣深二后
鍾心三靈佇眷自前朝不豫任總邦家威惠相宣刑禮
兼設且地彰靈璽天表長彗布新除舊禎祥咸顯文皇
知子之鑒事甚帝堯傳弟之懷久符太伯今可還申舊
志崇立賢君中外宜依舊典奉迎輿駕是日帝出居別
殿大建二年四月乙卯薨時年十九帝性仁弱無人君
之器及卽尊位政刑皆歸冢宰故宣太后稱文帝遺志
而廢焉

論曰陳武帝以雄毅之姿屬殷憂之運功存拯溺道濟
橫流應變無方蓋惟人傑及乎西都盪覆江表沾危僧
辯任同伊尹空結桐宮之恨貞陽人假秦兵不息穆羸
之泣帝乘隙以舉乃蹈玄機王業所基始自於此柴天
改物蓋有憑云文帝以宗枝承統情存兢惕加以崇尚
儒術愛悅文義恭儉行已勤勞濟物志度弘遠有前哲
之風至於臨下明察得永平之政矣臨海懦弱有同於

帝擊文后雖欲不鑿股道蓋亦其可得耶

南史卷九

終

四日之風

一

南史卷十

陳本紀下第十

李延壽 唐

高宗孝宣皇帝諱頊字紹世小字師利始興昭烈王第二子也梁中大通二年七月辛酉生有赤光滿室少寬容多智略及長美容儀身長八尺三寸垂手過膝有勇力善騎射武帝平侯景鎮京口梁元帝徵武帝子姪入侍武帝遣帝赴江陵累官為中書侍郎時有軍主李總

康熙二十五年

南史卷十

本紀

一

與帝有舊每同游處帝嘗夜被酒張燈而寐總適出尋
反乃見帝是大龍便驚走他室魏平江陵遷于長安帝
貌若不慧魏將楊忠門客張子煦見而奇之曰此人虎
頭當大貴也永定元年遙襲封始興郡王文帝嗣位改
封安成王天嘉三年自周還授侍中中書監中衛將軍
置佐吏歷位司空尚書令廢帝卽位拜司徒錄尚書都
督中外諸軍事光大二年正月進位太傅領司徒加殊
禮劔履上殿十一月甲寅慈訓太后黜廢帝爲臨海王
以帝入纘皇統是月齊武成帝殂

太建元年春正月甲午皇帝卽位於太極前殿大赦改
元文武賜位一階孝弟力田及爲父後者賜爵一級鰥
寡不能自存者人賜穀五斛復太皇太后尊號曰皇太
后立妃柳氏爲皇后世子叔寶爲皇太子封皇子江州
刺史康樂侯叔陵爲始興王奉昭烈王祀乙未謁太廟
丁酉分命大使觀省四方風俗以尚書僕射沈欽爲左
僕射度支尚書王勳爲右僕射辛丑祀南郊壬寅封皇
子建安侯叔英爲豫章王豐城侯叔堅爲長沙王二月
乙亥耕籍田夏五月甲午齊人來聘丁巳以吏部尚書
徐陵爲尚書右僕射秋七月辛卯皇太子納妃沈氏王
公以下賜帛各有差冬十月新除左衛將軍歐陽紇據

廣州反辛未遣開府儀同三司章昭達討之

二年春二月癸未章昭達禽歐陽紇送都斬于建康市

廣州平三月丙申皇太后崩丙午曲赦廣衡二州丁未

大赦又詔自討周迴華皎以來兵所有死亡者並令收

斂并給棺槨送還本鄉夏四月乙卯臨海王伯宗薨戊

寅皇太后祔葬于萬安陵五月壬午齊人來弔六月戊

子新羅國遣使朝貢辛卯大雨雹乙巳分遣大使巡州

郡省冤屈冬十一月辛酉高麗國遣使朝貢十二月癸

巳雷

三年春正月癸丑以尚書右僕射徐陵爲尚書僕射辛

酉祀南郊二月辛巳祀明堂丁酉耕籍田三月丁丑大

赦夏四月壬辰齊人來聘五月辛亥高麗新羅丹丹天

竺盤盤等國並遣使朝貢六月丁亥江陰王蕭季卿以

罪免甲辰封東中郎長沙王府諮議參軍蕭彝爲江陰

王冬十月乙酉周人來聘十二月壬辰司空章昭達薨

四年春正月丙午以尚書僕射徐陵爲左僕射中書監

王勣爲右僕射二月乙酉立皇子叔卿爲建安王三月

乙丑扶南林邑國並遣使朝貢夏五月癸卯尚書右僕

射王勣卒是月周人誅冢宰宇文護秋八月辛未周人

來聘九月庚子朔日有蝕之辛亥大赦丙寅以故太尉

徐度儀同三司杜稜程靈洗配食武帝廟庭故司空章昭達配食文帝廟庭冬十一月己亥地震是歲周建德元年

五年春正月癸酉以吏部尚書沈君理爲尚書右僕射領吏部辛巳祀南郊二月辛丑祀明堂乙卯夜有白氣如虹自北方貫北斗紫宮三月壬午以開府儀同三司吳明徹都督征討諸軍事略地北邊丙戌西衡州獻馬生角己丑皇孫胤生內外文武賜帛各有差爲父後者賜爵一級夏六月癸卯周人來聘秋九月癸未尚書右僕射沈君理卒壬辰晦夜明冬十月己亥以特進周弘

正爲尚書右僕射乙巳吳明徹剋壽陽城斬王琳傳首建鄴梟于朱雀航十二月壬辰詔熊曇朗留異陳寶應周迪鄧緒等及王琳首並還親屬以弘廣宥乙巳立皇子叔明爲宜都王叔獻爲河東王是歲諸軍略地所在剋捷

六年春正月壬戌赦江右淮北諸州甲申周人來聘高麗國遣使朝貢二月壬辰朔日有蝕之辛亥耕籍田夏四月庚子彗星見六月壬辰尚書右僕射周弘正卒冬十一月乙亥詔北邊行軍之所並給復十年十二月戊戌以吏部尚書王瑒爲尚書僕射

七年春正月辛未祀南郊三月辛未詔豫二兗譙徐合
霍南司定九州及南豫江郢所部在江北諸郡置雲旗
義士往大軍及諸鎮備防夏四月丙戌有星孛于大角
庚寅監豫州陳桃根獻青牛詔以還百姓乙未桃根又
上織成羅紋錦被表各二詔於雲龍門外焚之壬子郢
州獻瑞鍾六六月丙戌詔為北行將士死王事者剋日
舉哀壬辰以尚書右僕射王瑒為尚書僕射己酉改作
雲龍神虎門秋八月癸卯周人來聘閏九月壬辰都督
吳明徹大破齊軍於呂梁是月甘露頻降樂游苑丁未
輿駕幸苑採甘露宴羣臣詔於苑龍舟山立甘露亭冬

十月己巳立皇子叔齊為新蔡王叔文為晉熙王十二
月壬戌以尚書僕射王瑒為左僕射太子詹事陸繕為
右僕射甲子南康郡獻瑞鍾一

八年春二月壬申以開府儀同三司吳明徹為司空夏
五月庚寅尚書左僕射王瑒卒六月甲寅以尚書右僕
射陸繕為左僕射新除晉陽太守王克為右僕射秋九
月戊戌立皇子叔彪為淮南王

九年春正月乙亥齊主傳位於其太子恒自號太上皇
是月周滅齊二月壬子耕籍田秋七月己卯百濟國遣
使朝貢庚辰大雨震萬安陵華表己丑震慧日寺刹及

死官寺重門一女子震死冬十月戊午司空吳明徹破
周將梁士彥於呂梁十二月戊申東宮成皇太子移于
新宮

十年春二月甲子周軍救梁士彥大敗司空吳明徹於
呂梁及將卒皆見囚俘不反三月辛未震武庫丙子分
命衆軍以備周乙酉大赦夏四月庚戌詔結在軍者並
賜爵二級又詔御府堂署所營造禮樂儀服軍器之外
悉皆停息掖庭常供王侯妃主諸有奉卹者並各量減
庚申大雨雹六月丁酉周武帝崩閏六月丁卯大雨震
大皇寺剝莊嚴寺露盤重陽閣東樓千秋門內槐樹及

鴻臚府門秋七月戊戌新羅國遣使朝貢八月戊寅隕
霜殺稻菽九月乙巳立方明壇于婁湖戊申以揚州刺
史始興王叔陵兼王官伯臨盟甲寅幸婁湖臨誓衆乙
卯分遣大使以盟誓班下四方以上下相警冬十月戊
子以尚書左僕射陸繕爲尚書僕射十二月乙亥合州
廬江蠻田伯興出寇縱陽刺史魯廣達討平之是歲周
宣政元年

十一年春正月丁酉南兗州言龍見二月癸亥耕籍田
秋七月辛卯初用大貨六銖錢八月丁卯幸大壯觀閱
武冬十月甲戌以尚書僕射陸繕爲尚書左僕射以祠

部尚書晉安王伯恭爲右僕射十一月辛卯大赦戊戌
周將梁士彥圍壽陽剋之辛亥又剋霍州癸丑以揚州
刺史始興王叔陵爲大都督總督水步衆軍十二月乙
丑南北克晉三州及盱台山陽陽平馬頭秦歷陽沛北
譙南梁等九郡民並自拔向建鄴周又剋譙北徐二州
自是淮南之地盡歸于周矣己巳詔并軍國所須多所
減損歸于儉約是歲周宣帝大象元年

十二年夏四月癸亥尚書左僕射陸縉卒己卯大雪壬
午雨五月癸巳以尚書右僕射晉安王伯恭爲尚書僕
射己酉周宣帝崩六月壬戌大風吹壞臯門中闕秋八
月己未周鄖州總管司馬消難以所統九州八鎮之地
來降詔因以消難爲大都督加司空封隨郡公庚申詔
鎮西將軍樊毅進督沔漢諸軍事遣南豫州刺史任忠
率衆趨歷陽超武將軍陳慧紀爲前軍都督趨南兗州
戊辰以司空司馬消難爲大都督水陸諸軍事庚午通
直散騎常侍淳于陵剋臨江郡癸酉智武將軍魯廣達
剋郭默城甲戌大雨霖丙子淳于陵剋柘州城九月癸
未周臨江太守劉顯光率衆來降是夜天東南有聲如
風水相激三夜乃止丁亥周將王延貴率衆援歷陽任
忠擊破之禽延貴等己酉周廣陵義軍主曹藥率衆來

降冬十月癸丑大雨震電十二月庚辰南徐州刺史河東王叔獻薨

十三年春正月壬午以中權將軍護軍將軍鄱陽王佺山卽本號開府儀同三司以尚書僕射晉安王伯恭爲左僕射吏部尚書袁憲爲右僕射二月乙亥耕籍田秋九月癸亥夜大風從西北來發屋拔樹大雨雹冬十月壬寅丹丹國遣使朝貢十二月辛巳彗星見西南是歲周靜帝大定元年遜位于隋文帝改元開皇元年

十四年春正月己酉上弗豫甲寅崩于宣福殿時年五十三遺詔凡厥終制事從省約金銀之飾不以入墳明

器皆用瓦以日易月及公除之制悉依舊準在位百司

三日一臨四方州鎮五等諸侯各守所職並停奔赴二月辛卯羣臣上諡曰孝宣皇帝廟號高宗癸巳葬顯寧陵帝之在田本有恢弘之度及居尊位寔允天人之屬于時國步初弭創痍未復淮南之地並入于齊帝志復舊境意及侵地疆弱之形理則懸絕犯斯不遑適足爲禽及周兵滅齊乘勝而舉略地還至江際自此懼矣旣而脩飾都城爲行禦之備獲銘云二百年後當有癡人脩破吾城者時莫測所從云

後主諱叔寶字元秀小字黃奴宣帝嫡長子也梁承聖

二年十一月戊寅生于江陵明年魏平江陵宣帝遷于
長安留後主於穰城天嘉三年歸建鄴立爲安成王世
子光大三年累遷侍中太建元年正月甲午立爲皇太
子十四年正月甲寅宣帝崩乙卯始興王叔陵構逆伏
誅丁巳太子卽皇帝位于太極前殿大赦在位文武及
孝弟力田爲父後者並賜爵一級孤老鰥寡不能自存
者賜穀人五斛帛二匹癸亥以侍中丹陽尹長沙王叔
堅爲驃騎將軍開府儀同三司揚州刺史乙丑尊皇后
爲皇太后丁卯立皇弟叔敦爲始興王奉昭烈王祀己
巳立妃沈氏爲皇后辛未立皇弟叔儼爲尋陽王叔慎
爲岳陽王叔達爲義陽王叔熊爲巴山王叔虞爲武昌
王甲戌設無碍大會於太極前殿三月癸亥詔內外衆
官九品以上各薦一人又詔求忠讜無所隱諱己巳以
新除翊左將軍永陽王伯智爲尚書僕射夏四月丙申
立皇子永康公胤爲皇太子賜天下爲父後者爵一級
王公以下賚帛各有差夷子詔鑲金銀薄度物化生土
木人絲華之屬及布帛短袂輕疎者並傷財廢業尤成
蠹患又僧尼道士挾邪左道不依經律人間淫祀祇書
諸珍怪事詳爲條制並皆禁絕秋七月辛未大赦是月
自建鄴至荊州江水色赤如血八月癸未天有聲如風

南史卷十
本紀
水相激乙酉夜又如之九月丙午設無碍大會於太極
前殿捨身及乘輿御服大赦辛亥夜天東北有聲如轟
飛漸移西北丙寅以驃騎將軍開府儀同三司揚州刺
史長沙王叔堅爲司空征南將軍江州刺史豫章王叔
英卽本號開府儀同三司

至德元年春正月壬寅大赦改元以江州刺史豫章王
叔英爲驃騎將軍開府儀同三司以司空揚州刺史長
沙王叔堅爲江州刺史征東將軍開府儀同三司癸卯
立皇子深爲始安王秋八月丁卯以驃騎將軍開府儀
同三司長沙王叔堅爲司空九月丁巳天東南有聲如

蟲飛冬十月丁酉立皇弟叔平爲湘東王叔敖爲臨賀
王叔宣爲陽山王叔穆爲西陽王叔儉爲南安王叔澄
爲南郡王叔興爲沅陵王叔韶爲樂山王叔純爲新興
王十二月丙辰頭和國遣使朝貢司空長沙王叔堅有
罪免戊午夜天開自西北至東南其內有青黃雜色隆
隆若雷聲

二年春正月丁卯分遣大使巡省風俗癸巳大赦夏五
月戊子以吏部尚書江總爲尚書僕射秋七月壬午皇
太子加元服在位文武賜帛各有差孝弟力田爲父後
者賜爵一級鰥寡癯老不能自存者人穀五斛冬十一

南史卷十一
月丙寅大赦是月盤盤百濟國並遣使朝貢

三年春正月戊午朔日有蝕之庚午鎮左將軍長沙王叔堅卽本號開府儀同三司三月辛酉前豐州刺史章大寶舉兵反夏四月庚戌豐州義軍主陳景詳斬大寶傳首建鄴冬十月己丑丹丹國遣使朝貢十一月己未詔脩復仲尼廟辛巳幸長干寺大赦十二月癸卯高麗國遣使朝貢是歲梁明帝殂

四年春正月甲寅詔王公以下各薦所知無隔輿阜二月丙申立皇弟叔謨爲巴東王叔顯爲臨江王叔坦爲新會王叔隆爲新寧王夏五月丁巳立皇子莊爲會稽

王秋九月甲午幸玄武湖肆艦艦閱武丁未百濟國遣使朝貢冬十月癸亥以尚書僕射江總爲尚書令吏部尚書謝朓爲尚書僕射十一月己卯大赦

禎明元年春正月戊寅大赦改元乙未地震秋九月庚寅梁太傅安平王蕭巖荊州刺史蕭瓛遣其都官尚書沈君公詣荊州刺史陳紀請降辛卯巖等帥其文武官男女濟江甲午大赦冬十一月丙子以蕭巖爲平東將軍開府儀同三司東揚州刺史丁亥以驃騎大將軍開府儀同三司豫章王叔英爲兼司徒十二月丙辰以前鎮衛大將軍開府儀同三司東揚州刺史鄱陽王伯山

南史卷十一
為鎮衛大將軍開府儀同三司

二年春正月辛巳立皇子恮為東陽王恬為錢唐王夏四月戊申有羣鼠無數自蔡洲岸天石頭渡淮至于青塘兩岸數日自死隨流出江是月郢州南浦水黑如墨五月甲午東冶鑄鐵有物赤色大如數升自天墜鎔所有聲隆隆如雷鐵飛出墻外燒人家六月戊戌扶南國遣使朝貢庚子廢皇太子胤為吳興王立揚州刺史始安王深為皇太子辛丑以太子詹事袁憲為尚書僕射丁巳大風自西北激濤水入石頭城淮渚暴溢漂沒舟乘冬十月巳亥立皇子蕃為吳王巳酉幸莫府山大校獵

十一月丁卯詔剋日於大政殿訊獄丙子立皇弟叔榮為新昌王叔匡為太原王初隋文帝受周禪甚敦鄰好宣帝尚不禁侵掠太建末隋兵大舉聞宣帝崩乃命班師遣使赴弔脩敵國之禮書稱姓名頓首而後主益驕書末云想彼統內如宜此宇宙清泰隋文帝不說以示朝臣清河公楊素以為主辱再拜請罪及襄邑公賀若弼並奮求致討後副使袁彥聘隋竊圖隋文帝狀以歸後主見之大駭曰吾不欲見此人每遣間諜隋文帝皆給衣馬禮遣以歸後主愈驕不虞外難荒于酒色不恤政事左右嬖佞珥貂者五十人婦人美貌麗服巧態以

從者千餘人常使張貴妃孔貴人等八人夾坐江總孔
範等十人預宴號曰狎客先令八婦人裝采箋製五言
詩十客一時繼和遲則罰酒君臣酣飲從夕達旦以此
爲常而盛修宮室無時休止稅江稅市徵取百端刑罰
酷濫牢獄常滿覆舟山及蔣山栢林冬月常多采醴後
主以爲甘露之瑞前後災異甚多有神自稱老子游於
都下與人對語而不見形言吉凶多驗得酒輒酌之經
三四年乃去船下有聲云明年亂視之得嬰兒長三尺
而無頭蔣山象鳥鼓兩翼以拊膺曰奈何帝奈何帝又
建鄴城無故自壞青龍出建陽門井涌霧赤地生黑白

毛大風拔朱雀門臨平湖草舊塞忽然自通後主又夢
黃衣圍城乃盡去繞城橘樹又見大蛇中分首尾各走
夜中索飲忽變爲血有血露階至於坐牀頭而火起有
狐入其牀下捕之不見以爲祇乃自賣於佛寺爲奴煨
糠之於郭內大皇佛寺起七層塔未畢火從中起飛至
石頭燒死者甚衆又采木湘州擬造正寢棧至牛渚磯
盡沒水中旣而漁人見棧浮於海上起齊雲觀國人歌
曰齊雲觀寇來無際畔始比齊末諸省官人多稱省主
未幾而滅至是舉朝亦有此稱識者以爲省主主將見
省之兆隋文帝謂僕射高頴曰我爲百姓父母豈可限

一衣帶水不拯之乎命大作戰船人請密之隋文帝曰
吾將顯行天誅何密之有使投梯於江若彼能改吾又
何求及納梁蕭嘽蕭巖隋文愈忿以晉王廣爲元帥督
八十總管致討乃送璽書暴後主二十惡又散寫詔書
書三十萬紙徧喻江外諸軍既下江濱鎮戍相繼奏聞
新除湘州刺史施文慶中書舍人沈客卿掌機密並抑
而不言初蕭巖蕭嘽之至也德教學士沈君道夢殿前
長人朱衣武冠頭出欄上攘臂怒曰那忽受叛蕭誤人
事後主聞之忌二蕭故遠散其衆以巖爲東揚州刺史
嘽爲吳州刺史使領軍任忠出守吳興郡以襟帶二州

使南平王嶷鎮江州永嘉王彥鎮南徐州尋詔二王赴
期明年元會命緣江諸防船艦悉從二王還都爲威勢
以示梁人之來者由是江中無一鬪船上流諸州兵皆
阻楊素軍不得至都下甲士尚十餘萬人及聞隋軍臨
江後主曰王氣在此齊兵三度來周兵再度至無不摧
沒虜今來者必自敗孔範亦言無渡江理但奏伎縱酒
作詩不輟

三年春正月乙丑朔朝會大霧四塞人鼻皆辛酸後
主昏睡至晡時乃罷是日隋將賀若弼自北道廣陵濟
韓擒虎趨橫江濟分兵晨襲采石取之進拔姑熟次於

新林時弼攻下京口緣江諸戍望風盡走弼分兵斷曲
阿之衝而入丙寅采石戍主徐子建至告變戊辰乃下
詔曰犬羊陵縱侵竊郊畿蠡蠹有毒宜時掃定朕當親
御六師廓清八表內外並可戒嚴於是以蕭摩訶爲皇
畿大都督樊猛爲上流大都督樊毅爲下流大都督司
馬消難施文慶並爲大監軍重立賞格分兵鎮守要害
僧尼道士盡皆執役庚午賀若弼攻陷南徐州辛未韓
擒虎又陷南豫州隋軍南北道並進辛巳賀若弼進軍
鍾山頓白土岡之東南衆軍敗績弼乘勝進軍宮城燒
北掖門是時韓擒虎率衆自新林至石子岡鎮東大將

軍任忠出降擒虎仍引擒虎經朱雀航趣宮城自南掖
門入城內文武百司皆遁出唯尚書僕射袁憲後閣舍
人夏侯公韻侍側憲勸端坐殿上正色以待之後主曰
鋒刃之下未可交當吾自有計乃逃於井二人苦諫不
從以身蔽井後主與爭久之方得入沈后居處如常太
子深年十五閉閣而坐舍人孔伯魚侍焉戍士叩閣而
入深安坐勞之曰戎旅在塗不至勞也旣而軍人窺井
而呼之後主不應欲下石乃聞叫聲以繩引之驚其太
重及出乃與張貴妃孔貴人三人同乘而上隋文帝聞
之大驚開府鮑宏曰東井上於天文爲秦今王都所在

投井其天意邪先是江東謠多唱王獻之桃葉辭云桃
葉復桃葉度江不用楫但度無所苦我自接迎汝及晉
王廣軍於六合鎮其山名桃葉果乘陳船而度丙戌晉
王廣入據臺城送後主于東宮三月己巳後主與王公
百司同發自建鄴之長安隋文帝權分京城八宅以俟
內外脩整遣使迎勞之陳人謳詠忘其亡焉使還奏言
自後主以下大小在路五百里纍纍不絕隋文帝嗟歎
曰一至於此及至京師列陳之車服器物於庭引後主
於前及前後二太子諸父諸弟衆子之爲王者凡二十
八人司空司馬消難尚書令江總僕射袁憲驃騎蕭摩

訶護軍樊毅中領軍魯廣達鎮軍將軍任忠吏部尚書
姚察侍中中書令蔡徵左衛將軍樊猛自尚書郎以上
二百餘人文帝使納言宣詔勞之次使內史令宣詔讓
後主後主伏地屏息不能對乃見宥隋文帝詔陳武文
宣三帝陵總給五戶分守之初武帝始卽位其夜奉朝
請史普直宿省夢有人自天而下導從數十至太極殿
前北面執玉策金字曰陳氏五帝三十二年及後主在
東宮時有婦人突入唱曰畢國主有鳥一足集其殿庭
以翬畫地成文曰獨足上高臺盛草變爲灰欲知我家
處朱門當水開解者以爲獨足蓋指後主獨行無衆盛

草言荒穢隋承火運草得火而灰及至京師與其家屬
館於都水臺所謂上高臺當水也其言皆驗或言後主
名叔寶及語爲少福亦敗亡之徵云旣見宥隋文帝給
賜甚厚數得引見班同三品每預宴恐致傷心爲不奏
吳音後監守者奏言叔寶云旣無秩位每預朝集願得
一官號隋文帝曰叔寶全無心肝監者又言叔寶常耽
醉罕有醒時隋文帝使節其酒旣而曰任其性不爾何
以過日未幾帝又問監者叔寶所嗜對曰嗜驢肉問飲
酒多少對曰與其子弟日飲一石隋文帝大驚及從東
巡登芒山侍飲賦詩曰日月光天德山川壯帝居太平
無以報願上東封書并表請封禪隋文帝優詔謙讓不
許後從至仁壽宮常待宴及出隋文帝目之曰此敗豈
不由酒將作詩功夫何如思安時事當賀若弼度京口
彼人密啓告急叔寶爲飲酒遂不省之高頴至日猶見
啓在牀下未開封此亦是可笑蓋天亡也昔苻氏所征
得國皆榮貴其主苟欲求名不知違天命與之官乃違
天也隋文帝以陳氏子弟旣多恐京下爲過皆分置諸
州縣每歲賜以衣服以安全之後主以隋仁壽四年十
一月壬子終於洛陽時年五十二贈大將軍封長安縣
公諡曰煬葬河南洛陽之芒山

論曰陳宣帝器度弘厚有人君之量文帝知豕嗣仁弱
早存太伯之心及乎弗念咸已委託矣至於續業之後
拓土開疆蓋德不逮文智不及武志大不已晚致呂梁
之敗江左日蹙抑此之由也後主因削弱之餘鍾滅亡
之運刑政不樹加以荒淫夫以三代之隆歷世數十及
其亡也皆敗於婦人況以區區之陳外鄰明德覆車之
跡尚且追蹤叔季其獲支數年亦爲幸也雖忠義感慨
致慟并隅何救麥秀之深悲適足取笑乎千祀嗟乎始
梁末童謠云可憐巴馬子一日行千里不見馬上郎但
見黃塵起黃塵汗人衣阜茨相料理及僧辯滅羣臣以
謠言奏聞曰僧辯本乘巴馬以擊侯景馬上郎王字也
塵謂陳也而不解阜茨之謂旣而陳滅於隋說者以爲
江東謂殺羊角爲阜茨隋氏姓楊楊羊也言終滅於隋
然則興亡之兆蓋有數云

南史卷十

終

南史卷十

水滸南漢元

東晉興平年燕王曹芳為

西蜀劉禪之子劉禪為

南漢元帝劉暠之子劉暠

南史卷十

